

四庫全書

子部

欽定四庫全書

子部

書畫彙考卷九

詳校官中書_臣沈 颺

侍讀_臣孫球覆勘

總校官進士_臣朱 鈐

校對官編修_臣沈清藻

謄錄監生_臣黃_臣鶚

欽定四庫全書

書畫彙考卷九

刑部左侍郎卞永譽撰

書九

宋

太宗

宋太宗勅蔡行帖

行書金
花箋本

勅蔡行省所劄子辭免領殿中省事具悉事不久任難

以仰成職不有總難以集序朕肇建綱領之官使率厥
司況六尚之職地近清切事繁而員衆以卿踐更既久
理宜因任俾領質省實出東求乃願還稱謂殊見撝謙
成命自朕於義毋違爾其益勵前修以稱眷倚所請宜
不允仍斷來章故茲詔示想宜知悉 十四日 勅
勅蔡行

元祐三年五月廿六日給事鄭穆拜觀

天生聖人與物自殊拜觀是勅蓋可見矣行公在

當朝功績大著宜膺是寵亦為不薄其德望之盛
子瞻已詳述庭堅不暇及聊志歲月云昔元祐乙
亥五月八日山谷黃庭堅

此卷乃太宗皇帝御筆勅一道蓋不允蔡行辭中
書省事者覲茲字畫飛動若虎踞龍騰風雲慶會
正以見聖天子生知不測遠異常流當時在廷之
臣得之為至寶中書公非問學忠勤有素曷承寵
錫若是哉誠金玉錦繡奚足比其直乎蔡氏子孫

當知其所重永永其藏用是書之以誌景仰云淳
祐丙午三月望日鄭清之頓書于養魚莊

欽惟我太祖聖化普浹夷夏清寧朝野士夫得以
書畫為樂定千百載之良遇也伯溫先生一日出
此卷乃曰宋太宗皇帝手勅裱展玩之見其落筆
驚人出言神化誠天生英特自出凡一頭地非世
可指倫雖晉之王劉陶索唐之歐虞顏柳當奴事
其間哉伯溫氏寶愛此卷甚於木難尺璧非識相

見須能洞鞠于茲也嘆羨不已拜書于末如此洪

武二十二年四月二十六日烏傷王禕謹記

此珊瑚網

本也按烏傷王忠文禕洪武五年使雲南六年遇害劉青田基卒於洪武八年而此載洪武二十二年王禕記中有伯溫出此卷云云其誤無疑或係洪武二年衍書二十兩字俟遇真蹟考正

宋太宗恤獄詔

紙本高尺餘長七尺四寸計三十三行每行十字御寶印前後二鈐縫印

三朱文

元印一

勅毛應佺朕念三聖之愛育蒸黔垂著典法申戒官吏
簡恤王章深切丁寧斯為至矣方郡官長如能刻意遵

奉與我共此何患不臻於訟息而法平哉今歆燠戒時
動植咸茂而園牆幽圉猶有繫縲愀然以思當食興歎
汝宜體是憂惻加於撫循無使狴犴之間重有淪胥之
困躬勤省察稱朕意焉勅書到日汝可速指揮塗飾灑
掃獄房常須淨潔每五日一度差人就獄內監逐人力
刷洗枷杻及逐日供給水漿兼罪人內有疾病者立便
差人看承醫療其委無骨肉者支與喫食有人供送茶
飯者亦須晝時轉送不得邀難減尅無使罪人或至饑

渴所有合歸法者候處斷之時給與酒食如小可罪犯
便須逐旋決遣若是大段刑禁事關人命亦須盡理速
行勘斷不得淹延仍散下管內汝宜常切提舉毋令曠
慢及候依此逐件施行訖聞奏故茲示諭想宜知悉夏
熱汝比好否遣書指不多及 十七日

三字大
于文 勅字倍
大

外錄

書畫舫云敏仲新收唐玄宗恤獄詔當時勅付毛
應佺者黃麻紙書舊在樵李項氏朱忠僖故物也

或云字比鵲鵲頌更勝駸駸乎李海泰和上矣余
驗詔文原屬中書秉筆止十七日三字御手書之
丑按仕學規範載宋初有國子博士毛應佺知寶
州日清節過人不取珠貝犀象等貨任滿宦橐蕭
然前詔殆出宋太宗耶此語能令敏仲心服遂為
改正標題矣

徽宗

徽宗深村竹樹詩

瘦金書

深村竹樹不知春
遠水殘霞接斷津
埜客衣冠渾懶散
相逢疑是避秦人
鳴野鶴作古村圖

徽廟御筆書千文

原文
不錄

外錄

格古要論云余嘗見宋徽廟御筆書千文一軸其
紙首尾長五丈有奇信乎匹紙三丈也

佑陵御書神夢記

原文
不錄

外錄

書系云佑陵御製御書神夢記蓋紀宣和三年五月二十七日夢安妃事也事奇文奇書又奇足稱

三絕

徽宗御書欲借風霜二詩帖

瘦金行楷
書紙本

欲借嵯峨萬仞崇故將工巧狀層峰數尋蒼色如煙合
一片盤根似蘚封院宇接連常藉竹池亭掩映却憑松
分明裝出依巖寺只欠清宵幾韻鐘

風霜正臘晨早見幾枝新預荷東皇化偷回北苑春旗

槍雖不類薜蘿似堪倫已有清榮諭終難混棘蓁

宋徽宗夏日詩帖

行楷書紙本高一尺一寸闊一尺五寸

夏日

清和節後綠枝稠寂寞黃梅雨乍收畏日正長凝碧漢
薰風微度到丹樓池荷成蓋間相倚逕草鋪裯色更柔
永晝搖紈避繁溽杯盤時欲對清流

宋勅王氏諸帖

勅王伯虎授建州司理叅軍

勅賜進士及第王伯虎士平居時談仁義履忠信以待
舉也雖然不試之職不任之事亦無以觀其所效焉今
茲初命爾所以行已之時維是勉懋見於事業尚有好
爵為爾寵休可特授將仕郎守建州右司理叅軍替張
仲綰來年三月成資闕候見任官成資日方得赴任

嘉祐四年六月日

中書令

闕

中書侍郎

闕

禮部郎中知制誥臣范鎮宣奉行

奉

勅如右牒到奉行

嘉祐四年六月日

侍中使

門下侍郎

關

給事中使

翰林學士兼侍讀學士左司郎中知制誥判宿

六月九日都事李堯民受

左司郎中

付吏部

左僕射

闕

右僕射使

吏部尚書

闕

刑部郎中知制誥權判

疇

吏部郎中充天章閣待制權同判 贊

吏部侍中

在密院

吏部侍郎使

左丞使

告將仕郎試祕書校書郎守建州右司理叅軍王伯虎
奉

勅如右符到奉行

主事

闕

太子中允充集賢校理權判
繪
令史劉瑛

書寫人解永安

嘉祐四年六月日下

右宋王公伯虎初登進士第授建州司理叅軍時
所受勅也按許文定公將誌公墓公為司理州有
疑獄久不決乃命徹械休于庭帷其廳而潛聽之
因互相咎質其是非明日訊之衆相顧而驚以服
出其濫死者三數人然則公可謂能其官不負於
勅詞矣公字炳之閩之福清人仕至戶部郎中從
子伯起後家吳中是生著作先生信伯為河南程

氏高第弟子子孫遂以儒業相承又十世為訥齋
隱君時勉且以醫名保其先世勅牒凡數軸手授
其子觀使謹藏之噫吳多故家求能保其故物而
不失者吾見王氏而已觀字惟顥方以名醫徵赴
京師以予交其父子間也盡攜其所藏者示予以
歲月考之此軸最久蓋嘉祐四年至今六百年矣
成化丙午七月乙卯奉訓大夫右春坊右諭德延
陵吳寬書

勅王伯虎檢詳樞密文字

勅王伯虎等樞密本兵其帥有屬以檢衆職以詳庶務
惟士之有材實者迺使居之爾等試職於此久而可信
宜進爾位且正厥名在朝在官勉其祇命可依前件

熙寧六年五月日

中書令

闕

中書侍郎

闕

右正言充集賢校理直舍人院臣許將宣奉行

奉

勅如右牒到奉行

熙寧六年五月日

侍中使

門下侍郎

闕

給事中使

五月二十七日未時都事丁昭嗣受

左司郎中

付吏部

左僕射

闕

右僕射

闕

吏部尚書

闕

尚書祠部員外郎充集賢校理權判 卞

尚書祠部員外郎充集賢校理同修起居注兼權同

判 瑾

吏部侍郎使

吏部侍郎

闕

左丞

闕

告登仕郎守太子中允檢詳樞密院禮房戶房文字刪
定例策兼修經武要略兼編修禮房國信條貫王伯虎
奉

勅如右符到奉行

主事

闕

權武昌軍節度推官充崇文院校書兼權判 安國

令史劉士謹

書令史杜章

熙寧六年五月日下

按墓誌公以吏部流內銓主簿改太子中允檢詳
樞密院禮房戶房文字一時建白數事議者以為
知國之大體而刪定例冊為件得八千七百有奇
又以泰山汾陰籍田朝陵行幸澶濮之類非常禮
撫其行于時者為件得一千五百又以高麗入貢
修成宴勞式皆奏上之觀此則宋之繁文亦可考

見矣此勅按家乘所錄首缺勅王伯虎等樞密本
兵九字吳寬

勅王伯虎權判太僕寺殿中省授守太常丞

勅登仕郎守太子中允檢詳樞密院禮房戶房文字刪
定例策兼編修禮房國信條貫兼權判太僕寺殿中省
王伯虎朕嘉爾勞序進厥官往率職事祇朕命懋哉可
特守太常丞仍加都尉散官差遣如故

熙寧八年十月日

勅王伯虎行祕書省校書郎

勅朝散郎監在京進奏院上輕車都尉賜緋魚袋王伯虎為政之方未嘗不以振淹滯為事知夫材良難得而善人弗忍也爾前以小疵去職累歲芥蒂疑似眾以為惜今拔拭登序以收來效還讐書之舊秩加中祕之新命益自敦勵毋負優渥可特依前朝散郎行祕書省校書郎勲賜如故

元祐二年十一月四日

公以館閣校勘坐事謫監鉛山縣鹽酒稅勅詞所謂小疵去職者也哲宗初遷朝奉郎再遷祕書省校書郎獲被此勅其後缺數行其詞載家乘可考也吳寬

勅王伯虎權知饒州

朝散郎行祕書省校書郎上輕車都尉賜緋魚袋王伯虎右可特授依前朝散郎權知饒州軍州兼管內勸農事替呂溫卿到任成資闕勲賜如故仍借紫候迴日却

依舊服色

又勅王伯虎等

勅王伯虎等朕進退多士各盡名實不以微罪廢其人
不以非才玷厥官以爾伯虎頃緣曠蕩之澤再復儒館
以爾忠臣出自冗散之秩來儀省戶而治已不肅人言
屢至尚分專城之寄往居別駕之任服我寬厚無重悔
尤可依前件

元祐二年十二月三十日

中書令

闕

尚書右僕射兼中書侍郎臣公著宣

中書侍郎臣呂大防奉

中書舍人臣孔文仲行

奉

勅如右牒到奉行

元祐三年正月一日

侍中

闕

尚書左丞權門下侍郎摯

給事中

臨

正月一日申時權都事蘇安靜受

權左司郎中彭次雲

付吏部

尚書令

闕

尚書左僕射

闕

尚書右僕射 公著

尚書左丞 摯

尚書右丞 存

吏部尚書 頌

吏部侍郎 覺

告朝散郎權知饒州軍州兼管內勸農事上輕車都尉

賜緋魚袋王伯虎奉

勅如右符到奉行

主事賈大年

考功郎中權 尹

令史魏宗式

書令史

闕

元祐三年正月二日下

按王氏家乘公凡五被制勅今真迹之存者四然
多缺而不完此則公出權饒州軍州所降者亦缺
其前數行幸當時三省官所署皆名在若呂申公
汲公孔舍人在中書劉忠肅公顧龍圖在門下王
右丞在尚書而吏部則蘇公子容孫公莘老元祐
人才信乎極一時之盛矣成化丙午八月上丁致

齋春坊朝房書寬

勅王蘋

勅王蘋汝咸以儒學擢在道山比贊相臣纂修鉅典凡
筆削之去取兼載不遺核朱墨之異同咸得其當按指
事實錄之法彰辨是與非之明備一代之成書詔萬世
而垂憲首嘉事領之績可忘紬繹之勞恭覽奏篇歎美
無斁故茲獎諭想宜知悉

宋著作王先生在紹興初以布衣被薦得召見行

在當戎馬間陳說數百言正而不迂高宗重之且有通儒之目遂除祕書省正字未幾兼史官校勘會勅范沖重修神宗哲宗實錄以辨宣仁太后之誣先生適預其事筆削有力書成此其獎諭之詞也已而有著作佐郎之命一時因論昔詆誣之罪追貶章惇蔡卞公論翕然始行然先生之學實出于河南程氏以躬行實踐致君澤民為事初不在於著述世主雖知所重而用之未當其任為可惜

爾先生為人見伊洛淵源錄讀者當自知之寬特
因其裔孫觀示此謹識其槩于後吳寬

李宗諤

李昌武銅魚詩帖

行書
紙本

詩送士龍腹兄從表弟翰林學士李宗諤上

銅魚四明守竹馬十年兄摻袂河梁別鳴橈澤國行登
樓知日近傍海見潮生郡政應多暇新詩幾首成

李建中

李西臺千文卷

楷書原文不錄帖內清字二傍誤作立人以粉塗之竟字無鈎作諱筆塗

字竹頭用粉塗之橫字右黃用粉塗改

款書

景德三年秋八月伊川道士柱史裔孫巖夫民伯

寫

西臺筆法冠于本朝遷幸得一觀

黃友子正觀

篆書

陸才夫觀

篆書

白舜欽畢仲筍觀

篆書

喻陟明仲王樸才原王備仲文觀

八分書

國初五代無能書者唯西臺一人而已信為奇蹟
耳大觀丁亥孟冬大年題

觀西臺墨寶多矣世京所藏千文尤為精妙晁端
彥美叔題元祐元年初伏日

余家所藏書畫三見晁氏跋圃田潘勗唐老元祐
二年上巳日題

九江賓嗣祖觀乙酉三月上旬休日

鄭圃李所宛丘康伯可獲攬

汪彥和丙午六月吉日觀

篆書

東坡謂林和靖書似西臺差少肉蓋取其韻勝也
至于矩撫古人始終不變則和靖所不及矣紹興
五年秋七月己亥孟忠厚

歐褚虞陸窘于古人法度世人是古非今但見前
賢名字已立不復更加評議如西臺作字圓轉飛
動氣象飄逸亞鍾王矣然不得齊名數子者出于

近世故也廣陵李樸德邵

嘗見世所謂李西臺書以為前輩輕于許可及見
此書乃知不我誣也余家藏千文三本僧高閑趙
模與此高草書趙行書此則正書各有妙處覽者
自當知之丁亥五月十二日雨中因閱法書重題
虎林逸民

跋西臺墨蹟

此書深厚溫醇有盛德若愚氣象稱西臺所作長

洲吳寬觀于無錫鄒氏因題

此題今不存

西臺書世不多見此卷千文結體遒媚行筆醇古
存風骨于肥厚之內按黃文節公庭堅評西臺書
肥不剩肉如美女豐肌而神氣清秀又謂其字中
有筆如禪家句中有律今觀此書信不誣也惟是
題名為隱語或以為疑然宋元題識數人皆極稱
賞而所謂柱史裔孫者固寓李姓其間也此其事
雖不可考要之為西臺書無疑其中殷敬匡恒字

皆有闕筆蓋翼宣藝真四廟諱也建中真宗時人
故所諱止此然玄朗字真廟以之事神尤所深禁
而不避者蓋祥符五年始上聖祖尊號詔天下不
得斥犯二字而此景德三年書實前五年也鄒君
光懋世寶此卷余借留齋中數月因題以歸之正
德十年五月廿又七日衡山文徵明題

嘉靖二十四年乙巳巳月廿又二日後學文彭焚
香盥手敬觀西臺千文于周于舜六觀堂之南軒

外錄

書畫舫云玉峰周氏世藏李建中千文一卷今在其後人處末簡宋元人品題極多下迨文徵仲父子皆有跋尾真名蹟也按建中書法本勗張從申而溫醇過之然世絕無知者不腆極口許可近始得之旋為誕嘉猶子購去矣吁

張從申書學源出王子敬筆氣絕似

李泰和第抑揚低昂過于雕琢亦是其所短也

又云城西王氏藏西臺草聖帖筆意峭拔在鄒氏

千文真蹟上

東觀餘論云西臺本學王大令書而拘攣若此猶韓非之學黃老李斯之師荀卿也然徐觀筆勢尚有先賢風氣固自佳

歐公試筆云世人有喜作肥字者正如厚皮饅頭食之未必不佳而視其為狀已可知其俗物字法中絕將五十年近日稍稍知以字書為貴而追跡前賢未有三數人古之人皆能書獨其人之賢者

傳遂遠然後世不推此但務于書不知前日工書
隨與紙墨泯棄者不可勝數也使顏公書雖不佳
後世見者必寶也楊凝式以直言諫其父其節見
于艱危李建中清慎溫雅愛其書者兼取其為人
也豈有其實然後存之久耶非自古賢哲必能書
也惟賢者能存爾其餘泯泯不復見爾

吳禮部集云唐詩文體凡屢變晚季遂不逮惟書
字迄三百年猶有貞觀永徽以來風骨氣韻李西

臺雖在宋初實唐人書法之終也過此則益變而下矣乃知古人法度能世守之未有不善者筆札細事爾可以考世變焉

李西臺六帖

李西臺六帖

隸古

中書舍人金溥為大司成王先

生題

司成為毘陵王文肅公也

土母帖

行書紙本

畏

項氏編號帖跋左
右多項氏印不錄

所示要土母今得一小籠子封全謔送不知可用否是

新安缺門所出者復未知何所用望批示春冬衣歷頭
賢郎未拾到其宅地基尹家者根本未分明難商量耳
見別訪尋穩便者若有成見宅子又如何細希示及
丑押諮 孫號西行少車今有舊車如到彼不用可貨
却也

披風帖

行書
紙本

金部同年載喜披風甚慰私抱殊未款曲旋值睽離必
然來晨朝車行邁適蒙示翰愈傷老懷惟冀保愛也萬

萬不勝銷黯見女夫劉仲謨秀才并第二兒子在東京
相次發書去如有事希周庇也建中簡上金部同年九
月十六日 湯世帖碑文三道畧表西京之物也 懷

湘南拙詩附上同院劉學士隲同年邵兵部希差人通

達或與面聞也建中又白

懷湘南東行
書雲箋本

貴宅帖

行書
紙本

貴宅諸郎各計安侍奉所示請改章服昨東封須得出
身歷任家狀一本并須齎擎官誥勅牒去未審此來如

何行遣也兼為庄子事已令彼僧在三學院安下近已
往彼去未迴此庄始初見說甚好只是少人管勾若未
貨可且收拾課租亦是長計不知雅意如何也俟親家
亦言可惜拈却 丑押諮 劉秀才久在科場洛中拔
解今西遊兼欲祇候府主希畧一見也

賢郎帖

建中白近賢郎秀才去專馳手書伏想已達左右玄律
將半陰風向嚴公理之外道養無爽此離羣寡侶望風

懷賢無日不然也時光流連同年知心凋落大半耳加之官途人事何牽纏至是哉惟再三保愛虔禱虔禱因人無恡玉音今左十秀才行謹寓狀諮問起居不宣同年兄李建中狀上屯田仁弟十一月十一日

左右帖

左右為河中有少里會家業被人羅織公途甚是分明希特與照燭也建中白

齊古帖

齊古同年仁弟相別已是隔年傾渴可量丹

闕

累垂示

翰益認道友劣兄自去秋患脾胃氣于今餌藥未獲全
愈復差出淮汴口祭醮然無力祇荷迴來冷氣又是發
動歸休之計未成多難故也此外別無疾嗜慾已絕訖
知仁弟又鼓盆莫且住脚也初夏惟保愛為切值女夫
劉先輩補吏昭應託寓狀諮問起居不宣 丑押書上
齊古同年仁兄三月六日 近蒙寄到書開却封却恐
是留臺陳公也已附西京去要知之

西臺字得中舉進士甲科太宗嘉之嘗直昭文館
改直集賢院出為兩浙轉運副使恬於榮利乞西
京留司御史臺愛洛中風土遂居之故號李西臺
東坡賦和靖詩云書似西臺差少肉者是也官至
判太常寺善書札然絕不多見於世寶祐乙卯夏
五建寧堂主題建袁立儒溪翁

黃太史嘗有跋云李西臺書與林和靖極相類但
和靖傷瘦西臺傷肥蓋林處士清苦而李集賢重

厚各似其作人耳建寧堂主併錄其語

予近得華山圖題曰崧高維嶽歐陽公所記神清之洞及李西臺隱居之地在焉軸尾載西臺卜築始末甚詳此帖出於西臺逸筆無可疑者前史官文及翁書

西臺書三十年前極罕得見近數數見之大概雄實篤厚如其人涪翁傷肥之論無乃太嚴此六帖信意行筆天真爛熳尤可愛世謂平園攻媿後村

不善書輒欲評書予之謂歟杭仇遠

李西臺書吾鄉有石刻徑三寸許今見真蹟遒勁
沈著誠不易得泰定二年乙丑四月望日京口郭
畀曾觀同郡張監共集

李西臺書與林和靖絕相類涪翁評之謂西臺傷
肥和靖傷瘦和靖清枯之士也瘦之傷為不誣西
臺之書類其為人典重溫潤何肥之傷也哉苕溪
唐氏易安室所藏凡六帖觀者自能評之當以余

言為然時至正二十五年夏六月朔會稽抱遺老人楊維禎在雲間草玄閣試老陸鐵穎書

古人書法魏有鍾元常晉有王逸少唐則歐虞顏柳前後相望今觀諸家之書皆瀟灑出塵應規入矩中間柳氏顏氏雖有肥濁瘦硬不同然皆各得字之精妙有未易以聲音笑貌及之也下此則宋西臺李建中其書法盡得古人之妙故能風軌魏晉掃湔塵俗得其一點一畫者皆可寶玩而況全

簡累字如此君子能珍藏之庶李氏之書不朽矣

金華姜后

行書
紙本

自憶西臺筆法精良宵長使夢魂驚讌酣展卷晴

窓下秋露春雲酒欲醒文江蕭引高

行書
紙本

太古先生與予俱客江寧雖居相密邇而足跡頗

疏為恨耳祕閣晚出几格間西臺李公墨蹟乃云

千里之地不能交一談而開胃臆思覲之深也如

此今昔不同交誼何異其書法則與嶽麓寺相似

間有一二行草可謂絕今超古者也宜寶之制河

王尹實跋

行楷
紙本

唐人書法自徐浩來已駸駸入于宋矣至蘇黃始
一大變而無復唐意今觀李西臺書雖在宋人當

去唐為不遠前論謂其有李北海之風是為知言

矣金華高士陳君大有得寶此帖間出相示觀畢

謹識時戊子歲五月一日也獨山王偁書

行書
紙本

余昔景慕前翰林中書王公尹實檢討王偁蕭引

高王門教授同郡姜居皆以文章顯著其二王公
特以篆草鳴于時今余辱廁朝列而諸公已相繼
物故不復見矣余雖後生齒亦衰憊閒居每有興
感茲偶獲觀諸公題李西臺之遺墨辭翰灑然宛
如昨日噫西臺在宋時書能見重于今之世若使
吾諸公片紙隻字垂數百年之久亦如今之取重
西臺之跡無異也世豈乏人哉三復展觀不能釋
手遂識以歲月云時正統七年八月中秋後二日

國子祭酒致仕金華貝泰題

行書
紙本

鍾王書法久寂寞羣議紛紛迷後學西臺遺跡世
應稀見此令人重驚愕文江劉日升拜手

外錄

黃先生豫章集云李君貺借示其祖西臺學士草
聖井書帖二軸以詩還之當時高蹈翰墨場江南
李氏洛下楊二人沒後數來者西臺唯有尚書郎
篆書草聖凡幾家奄有漢魏跨兩唐紙摹石鏤見

髣髴曾未得似君家藏側理數紙冰不及字體傾
敲墨猶濕明窓棐几開卷看坐客失床皆起立新
春一聲雷未聞何得龍蛇已驚蟄仲將伯英無後
塵邇來此公下筆親使之早出見李衛不獨右軍
能逼人枯林棲鴉滿僧院秀句爭傳兩京遍文工
墨妙九原荒伊洛氣象今淒涼夜光入手愛不得
還君復入古錦囊此後臨池無筆法時時夢到君

書堂

林逋

林和靖二帖

秋深帖

逋奉白秋深體履清適大師去後曾得信未院中諸事
如常否今送到菱角容易容易謹此馳致不宣逋小簡
上廿二日珎兄座主 暫倩一人引此僕去章八郎家
三君帖

逋奉簡三君數日前曾勞下訪屬以多故未果致謝感

愧感愧榜名必已見了彼珍重者果為兩手所指矣呵
呵如因暇時許相過否馳此不宣從表林逋頓首四月
十七日 所托買物錢二索省是前人留下尚恐未足
餘伺面致多感

此和靖真蹟聶衛公帥蜀時所得也觀其筆勢道
勁無一點塵俗氣與暗香疎影之句標致不殊此
老胸中深有得梅之清故其發之墨者類如此當
襲藏之以為珍玩元統甲戌夏五謝升孫書于南

窓

我愛翁書得瘦硬雲腴濯盡西湖淥西臺少肉是
真評數行清瑩含冰玉宛然風節溢其間此字此
翁俱絕俗開緘見字即見翁五百年來如轉燭可
憐人物兩相求落我掌中珠有足水邊孤墳我曾
拜土冷烟荒骨難肉當時州吏歲勞問于今祀典
誰登錄翁固不能知我悲聊對湖山歌楚曲我歌
湖山亦不知惟有春鳩叫深竹歸來把酒弔雙緘

猶勝無錢對黃菊沈周用坡翁韻

西湖處士林君復結廬倒臥湖波淥百年何物傷
汝廉山下梅花總寒玉滿城屋瓦鱗鱗然未信誰
人能脫俗紫陌嬉春拾翠鈿歌鐘入夜燒紅燭獨
教老鶴閒應門走傍湖陰濯雙足高平范公遣使
來寄以新篇勝餽肉風節文章厚且淳兩句平生
成實錄才多墨妙更入神唯許唐翁和高曲果然
遺壘似其人如倚清風捫瘦竹惜哉甫里陸天隨

不趁斯人書杞菊吳寬

湖亭路繞梅花曲石硯年年洗芳淥湖光照眼花
絕塵此老當年面如玉詩應獨步難同調字豈必
工終不俗城東蒼頭持卷來一夜起看三秉燭我
從書法得相法骨瘦神清臞亦足有如辛苦學仙
人火冷空山斷葷肉遺編舊事已陳跡五百年來
登鬼錄水流花落兩無情誰能更和西湖曲石田
詩人亦清士居不種梅翻種竹他時併作隱君論

何似周蓮與陶菊李東陽

我昔孤山訪遺躅春暖西湖汎晴淥山頭草樹不
荒涼知是先生此埋玉念初茅廬結構完長吏頻
顧驚流俗就中薛李最忘形湖上夜歸曾秉燭先
生自樂味道腴此懷何嘗忘不足惟耽吟詠苦嘸
咎役擾心兵削肌肉詩成又復恐驚世輒毀不使
相謗錄誰知造物難盡藏千古騷壇傳妙曲亦有
遺墨落人間留在剡藤并楚竹見其瘦硬想其人

似對靈均殄落菊陳頎

乾坤悠悠書兩幅墨光深照西湖淥人間番覆似
浮雲此紙完全如璧玉少陵瘦硬真入評右軍安
媚宜云俗想當援筆對梅花誰用官奴寒把燭自
然心畫得天妙一字百金酬不足乃知形貌列仙
臞石帶烟霞山少肉崑崙氣節高百世奚假文章
身後錄東坡去後古祠荒月下不聞迎送曲遺跡
君家豈偶然天遣清風激脩竹憑君開卷望孤山

三灌薔薇咀秋菊張淵

林和靖詩卷

紙本高九寸二分長八尺七寸

制誥李舍人以松扇二柄并詩為遺亦次來韻

編松為簞寄山中兼得紫微詩一通入手涼生殊自慰
可煩長聽隱居風

孤山雪中寫望

片山兼水繞晴雪復漫漫一逕何人到中林盡日看遠
分樵載重斜壓葦叢乾樓閣嚴城寺疎鐘動晚寒

孤山從上人林亭寫望

林表秋山白鳥飛
此中幽致世還稀
誰家岸口人煙晚
坐見漁舟兩兩歸

送史殿省典封川

炎方將命選朝倫
治行何嘗下古人
擁旆肯辭臨遠郡
登艫還喜奉慈親
水連芳草江南地
烟隔寒梅嶺上春
若過中途值歸鴈
慰懷能與致音塵

春日齋中偶成

空堦重疊上垣衣白晝初長社鷺歸落盡海棠人臥病
春風時復動齋扉 殿直丁君自沂適閩艤舟惠顧晤
語未幾且以拙詩為索病中援筆勉書數章少塞好事
之意耳時皇上登寶位歲夏五月孤山北齋手書林逋
記

書和靖林處士詩後 蘇軾

吳儂生長湖山曲呼吸湖光飲山綠不論世外隱
君子傭兒販婦皆冰玉先生可是絕俗人神清骨

冷無由俗我不識君曾夢見眸子瞭然光可燭遺
篇妙字處處有步遶西湖看不足詩如東野不言
寒書似留臺差少肉平生高節已難繼將死微言
猶可錄自言不作封禪書更肯悲吟白頭曲我笑
吳人不好事好作祠堂傍脩竹不然配食水仙王
一盞寒泉薦秋菊

右小行楷書十
四行本帖紙尾

右和靖林處士君復手書七言近體五首其語沖
夷可詠而結體尤峭勁然有韻態不作崑崙骨立

也蘇長公一歌其推許此君至矣然至詩如東野
不言寒書似留臺差少肉二語便是汝南月旦何
嘗少屈孤筆也留臺者李建中也嘗分司御史臺
考之集稱西臺以偶東野尤當更稱耳長公書法
勻穩妍妙風神在波拂間而麗句層出尤刺人眼
始錢唐人即孤山故廬以祀和靖游者病其湫隘
因長公詩後有我笑吳人不好事好作祠堂傍修
竹遂徙置白香山祠與長公配迨於今香火不絕

乃其遺蹟與長公同卷價踊貴十倍太史公有云
伯夷叔齊得夫子而名益彰若君復者抑何其多
幸也歟萬歷壬午嘉平月吳郡王世貞謹題

世言林和靖先生字不如詩詩不如人然觀此卷
亦自瘦勁有法杜襄陽詩云書貴瘦硬方通神豈
先生謂耶世人貴耳若無坡翁詩此卷當無以重
價售者第蘇長公去先生時代無幾為長歌題其
卷後推重至此吾輩固當以坡翁增重詎使重末

而忘其本耶若蘇書則又是其平生合作余兄謂
君復多幸誠然誠然萬厯丁亥春正月吳郡王世
懋書於奉常齋中

宋綬

宋宣獻千文

小楷書原文不錄

外錄

山谷跋湘帖羣公書云李西臺出羣拔萃肥而不
剩肉如世間美女豐肌而神氣清秀者也但摹手

或失其筆意可恨耳宋宣獻富有古人法度清瘦而不弱此亦古人所難蘇子美蔡君謨皆翰墨之豪傑也歐陽文忠公頗于筆中用力乃是古人法但未雍容耳徐鼎臣筆實而字畫端勁亦似其文章至于篆則氣質高古與陽冰並驅爭先也

又云往時士大夫罕能道宣獻書札之美者前日裕陵游心藝文頗歸翰墨于宋氏于是天下靡然承風牆隅敗紙蛛絲煤尾之餘無不軸以象玉表

以綈錦士大夫書尺間班班皆有筆勢老杜云太宗妙其書是以數子至有味其言也

又云近世士大夫書富有古人法度唯宋宣獻公耳如前翰林侍書王著書樂毅論及周興嗣千字筆法圓勁幾似徐會稽然病在無韻如宣獻公能用徐季海筆暮年擺落右軍父子規摹自成一家當無遺恨矣

又題洛神賦後云予嘗疑洛神賦非子敬書然以

字學筆力去之甚遠不敢立此論及今觀之宋宣獻公周膳部少加筆力亦可及此

米氏書史云本朝太宗挺生五代文物已盡之間天縱好古之性真造八法草入三昧行書無對飛白入神一時公卿以上之所好遂悉學鍾王至李宗諤主文既久士子始皆學其書肥褊朴拙是時罔不謄錄以投其好用取科第自此惟趨時貴書矣宋宣獻公綬作參政傾朝學之號曰朝體韓忠

獻公琦好顏書士俗皆學顏書及蔡襄貴士庶又
皆學之王文公安石作相士俗亦皆學其體自此
古法不講能隸書者武勝留後劉瑗能草書者承
議郎滕中孚宗室仲忽能行書者宣德郎鮑慎由
能篆書者宣德郎趙震已上是學古人書者餘未
見

書畫舫云宋宣獻公名綬字公垂楷法為宋初第
一極得黃庭經樂毅論遺法長洲黃氏藏其小楷

千文一卷原係宋潛溪故物即天章閣所貯舊本也按宣和書譜稱其筆法清癯而不纖弱輕活秀潤在李建中之上殆非過許云

石延年

石曼卿古松詩

大楷書

直氣森森恥屈盤鐵衣生澀紫鱗乾影搖千尺龍蛇動
聲撼半天風雨寒蒼蘚靜緣離石上綠蘿高附入雲端
報言帝室掄材者便作明堂一柱看

曼卿上世家幽州燕俗勁武少以氣自豪書體兼
顏柳前輩謂愈大愈奇余三見真蹟禮部尤尚書
家西帥詩有旗光秋曉起甲色大江橫之句歐陽
氏籌筆驛詩有意中流水遠愁外舊山青之句今
又見此詩影搖千尺聲撼半天尤為膾炙皆警策
也歐陽公稱文章勁健稱其意氣余以謂字畫猶
有劍拔弩張之勢吾鄉郡從事官舍中先有籌筆
驛詩石刻久矣今趙君致遠又欲刻此是為二妙

也四明樓鑰

節度推官廳事舊有籌筆驛詩刻流傳入郡圃中
師夏請于使君得復舊貫暇日過袁君木叔家見
古松詩筆其嚴密勁健尤為卓絕因摹刊之以為
籌筆驛詩刻之對曼卿翰墨不多見於世藐然從
事之廬破屋數間雖不足以避風雨而二刻屹立
其中未可以為陋也又得文昌樓公為之題識益
光榮矣木叔之先君子好奇嗜古所蓄前輩遺墨

甚衆此其一耳慶元己未上元日古汴趙師夏書
士大夫豪宕奇崛者為文必峭拔清美閒放者有
句必高妙故梅詩之疎影橫斜和靖如圖寫此花
松詩云半天風雨曼卿獨膾炙人口也自昔論詩
者嘗謂寫情非難狀物最難過於體倣或失之俗
畧於比喻又失之泛必渾然天成它物不足以當
之斯為美爾曼卿平生意氣卓犖多慕古人奇節
偉行其見於辭章之末又肯為兒女子軟媚語耶

梅聖俞以雲影濤聲之句過此作非矣節推趙公
得真蹟於袁正肅之仲弟木叔而刻之石二百年
來陵移谷遷何物不為塵土之歸而此刻至今存
焉半雲翁亦在篋藏故物之列家既析異又幸心
可得而寶之造物者若有私焉嗚呼故家遺物歷
年之久而卒獲所歸有如此帖者乎敬書此以識
余感歲在玄默敦牂五月望北山老樵黃參書
天之酒星化曼卿之神薄遊鶯花世界醉日月於

酒船真能以大夢處世者歸主芙蓉城宜其仙也
雪堂翁詩以寶之今想與赤壁化鶴同翱翔其樂
無涯曼卿詩句字畫名賢品贊蔑以加矣豈容言
下著語此詠古松墨蹟余獲拜觀不覺神爽飛越
自慶為平生之幸弘治乙丑冬十一月十日吳郡
黃雲題于華氏之尚古樓

嘉靖卅五年墨林子裝襲原值十五金

蘇舜欽

蘇子美今春尺牘

草書粉箋本

今春遍遊蘇城之民圃絕有佳處奇花偉石非它所見也如歸亭風月甚可喜使僕慨然忘歸深足樂耳

蘇子美亡後四年得之陳繹

蘇滄浪留別王原叔古詩帖

草書

交道今莫言難以古義責錙銖較利害便有太行隔予生惟闊疎逢人出胸臆一旦觸駭機所向盡戈戟平生交游闕化為虎狼額謗氣慘烈烈中之若病瘕遂令老

成人坐是亦見斥既出芸香署又下金華席摧辱實難
任宦名必非惜罪始職于予時情未當隙今來濠州涯
日夜自羞惕高風激頰波相遇過平昔白玉露肺肝晴
雲見顏色乃知天壤間自有道義伯明日又告行嗟嗟
四海窄 舜卿作詩留別原叔八丈閣下慶厯乙酉清
明日書

右宋蘇子美古詩百五十言留別原叔八丈蓋王
洙原叔也詩語俊拔義氣悲壯歐陽公謂其廢放

後時發憤悶於歌詩殆是類也字畫出入顏魯公
徐季海之間而端勁沈著得于顏魯公為多當時
評者謂為花發上林月滉淮水豈其然乎按子美
慶歷四年丙戌十一月坐監進奏院會客事除名
徙蘇州此詩後題清明日則是被放之三閱月也
時原叔以天章閣侍講史館檢討黜知濠州正坐
子美事故詩云遂令老成人坐是亦見斥時子美
年三十有八原叔五十一故有老成及八丈之稱

又有今來濠州涯及明日又告行等語當是隨原叔至濠及是乃別耳其後子美竟以慶歷八年卒于蘇凡居蘇四年宜其遺蹟流傳吳中為多去今數百年所謂滄浪亭者雖故址僅存亦惟荒烟野草而已至於文章翰墨不少概見宣和書譜謂斷章片簡人爭傳播豈在當時亦不易得耶此詩雖非蘇事而實赴蘇時作少宰徐公子容以為郡中故實因重價購之俾徵明疏其大畧如此若其志

節履行具正史者茲不復云嘉靖乙未文徵明跋

按跋內云子美慶歷四年丙戌十一月坐監進秦院會客除名考慶歷五年係乙酉慶歷丙戌則六年也以四年為丙戌悞又子美會客除名通鑑載事在慶歷五年正月以為四年十一月或別有考耶

蘇子美南浦詩帖

草書
紙本

一 項氏編號項氏諸印不錄

南浦隨花去迴舟路已迷暗香無覓處日落畫橋西

陳洎

陳亞之詩帖

小字俱
自註

離郭店馬上迴寄鄉知

迴望離亭映楚山慨然西笑入長安
貪程野僕擔書引惜別鄉人駐足觀
霞襯曙光烘積靄柳和春色蕩輕寒
遙期此地歸來日迎取相如駟馬看

題缺

呼樹止陵陽逢辰下建章奇姿標上瑞
正色麗中央昭祀祠壇畔歌聲太液傍
鳳教鴻作侶天與菊為裳神雀

非靈異流鶯愧彩章集汗寧我類一舉戛雲翔

過項羽廟

八千子弟已投戈夜帳猶聞怨楚歌學敵萬人成底事
不思一箇范增多

寄寶臣寺丞

萬里扶靈宅壽阡謝公純孝是家傳廬開四尺同寒士
棖列三圍陋昔賢先域定生連理樹門人多廢蓼莪篇
我心罔極君應念露白霜清泣昊天

藍溪閒居

白鹿原東虎候西，結廬岑寂映藍溪。
霜侵僧履蘭三逕，秋入農歌雨一犁。
耽枕溜聲疑水宿，拂簷山色類巖棲。
閉門養拙無人問，揭盡陳篇日又低。

開元寺凌虛閣對雪寄解唐卿

藍田

瑤滴琳華一夜凝，凌虛雕檻曉來凭。
眼觀銀色三千界，身到瑤臺十二層。
玉灑砌塵供庾斛，粉融簷水妬房陵。
化人宮好分明在，恨不同君把袂登。

雉媒

朱冠袞背一何鮮聲厲情驕目悍然若道物情皆錫類
雉媒爭似鴝媒賢

還劉處士先令公

鄴

功名錄

劉公事
朱梁

當年力戰蕩妖氛十萬雄師四七勲將畧妙欺班定遠
家聲高過李將軍銘圖魏鼎文猶在筆勒燕山蹟尚分
今日閒披有遺恨可憐生不遇明君

讀劉蕡策

以指斥貴倖不顧忌
諱有司知而不取

藥石危言治亂箴賈生晁錯是知音可憐當日司文者
不畏人言合愧心

謝人惠三峰朱柿

烏桕珍果益丹名新折紅林蒂尚青漿冷夜凝仙掌露
味甘秋剖楚江萍圓堆玉椀櫻難並剩薦金尊酒易醒
應念茂卿消渴者整籃封貯到雲扃

過田文墓

當年聞奏雍門琴話著池臺泪滿襟何況今朝陵谷畔

池臺無迹可追尋

對雪寄崔仲裕

時在藍田聞
崔在酒舍

奪鶴韜霞勢漸濃
卷簾庭館好支筇
乘槎路闊寒凝凍
種玉畦平曉被封
天上瑤宮當月圃
海中銀闕聳鰲峰
思君不得同吟賞
知在旗亭第幾重

南齊

曲江歡宴侍華裾
舞拍琴歌藝有餘
獨有純臣王叔寶

解陳封禪一篇書

南齊太祖曲江宴羣臣各使效伎藝
褚淵彈琵琶王僧虔彈琴沈文季歌

張敬兒舞王敬則拍王儉曰臣無所解唯解誦書因跪
帝前誦相如封禪書帝笑曰此盛德之事吾何以堪之

湖上逢漁者

雨蓑烟笠洞庭秋獨繭綸輕一葉舟擬共停撓醉天幕
緩歌濯足不迴頭

秋日端居

暑退蚊雷靜門閒雀刺稀露莎蛩自急星樹鵲何依井
臼貧雖樂溪山遠未歸時情似秋鴈一一背寒飛

讀子虛賦

聽辭深恨不同時及到同時位太卑爭似唐皇將頗牧
禁中言下用無疑

陳公亞之三十丈復不逮承其教誨也事業在卿
士大夫者以補國利民傳復少於先子遺書中得
公啓問詩章讀之往往意在棲退若送行閨中詩
公時為審刑官朝中望譽始充大已有乞醉墻間
之歎是知君子自重而不苟合者虞富貴以非道
而至如盜竊禽暴焉則非道者惡得而及之然後

踐履無非義施張莫不仁事功可勝紀哉公忠言
美庸固易考清遠之趣疑多在文章常恨不得盡
見之熙寧九年冬居彭城公孫師仲出雜詩藁一
卷詞格秀古造句愈工則入淡泊愈深若借宅云
四壁舊貧寧畏盜一枝雖小易容巢贈無已師云
他年遠公社若箇是遺民藍溪閒適云露侵僧履
蘭三徑秋入農歌雨一犁秋居云井臼貧雖樂溪
山遠未歸胎漁者云擬共停橈醉天幕緩歌濯足

不迴頭聞之者孰不灑然而若醒超然而自愛復
擬在文章者今一卷之藁已得如是之多固足為
喜又得玩君子始終之尚篤吾所好顧何樂如之
詩大小二十二篇閨中送行不預焉逸者可知已
十一月三日曲阜顏復書

穆覽詩緬想風跡而欽鹽鐵君趣尚遠矣

書故三司副使陳公詩軸後

破錦囊開玉振金舍人胸次右丞心為時黼藻衣

冠數與國丹青翰墨林慷慨似誰雙舞劍風流隨
處一歌琴燕詒苦志追先烈子夏何須論淺深元
豐二年三月廿三日陳留張徽

元豐四年七月於禾興始識公孫師仲師道遂得
公之遺稿以觀長樂林希

天聖中先太尉與故相國龐公同為郡牧判官故
省副陳公與龐公善光以孺子得拜陳公於榻下
元豐二年八月乙丑晦陳公之孫法曹過洛以公

手書詩藁相示追計五十年矣嗚呼人生如寄其
才志之美所以能不朽於後者賴遺文耳苟無賢
子孫其湮沒不顯於世可勝道哉光竊自悲侍公
之久今日乃得睹公之文又喜法曹君之賢能顯
融其先烈是敢嗣書于羣賢之末涑水司馬光

楷書

紙本

陳公固所嘗聞然不及見也今公之孫以公詩為
示讀之亦足以想見其風采矣元豐四年七月一

日高郵孫覺題

故三司副使吏部陳公軾不及見其人然少時所
識一時名卿勝士多推尊之邇來前輩凋喪畧盡
能稱誦公者漸不復見得見其俚言遺事皆當記
錄寶藏況其文章乎公之孫師仲出公之詩廿五
篇以示軾三復太息以想見公之大畧云元豐四
年十一月廿二日眉陽蘇軾書

轍頃在南都傳道陳君以鹽鐵公詩草相示轍甚

愛公詩之精且嘉君之孝恭不墜世德後六年自歙州還京師見君於鄴陽復出此詩為示不可以再見而不之志也丙寅正月七日趙郡蘇轍題

故吏部彭城陳公在仁廟時以御史奉使關中積以故人子見公又見之於河內其後五十年見公孫於淮南於是獲其詩稿伏而歎息蓋不敢少有述焉也即幸而有如平日公以父黨教之讀詩可也如與之言詩則未可也已元祐六年春二月十

三日山陽徐積書

世雄竊伏吏部陳公之賢與令德之孫有以顯融
其後皆見於名卿偉人之所論載幾於成書矣世
雄不復形容其畧獨念元豐壬戌間初識傳道於
松陵獲見此書又三年一解后無已於京師今廿
有二年矣而二君皆以不遇卒崇寧癸未端午傳
道之子孝友復抱此書泣以相過撫卷悲悼益以
知臧孫之有後竊意此書自是與陳氏之祖孫隱

矣疑其可自致於斗牛之間者金石所不能礙也
南蘭陵錢世雄謹書

如彼泉流必有源陳家詩律自專門后山得法因
鹽鍊不減唐朝杜審言嘉定丙子冬孟二十四日
睢陽任希夷敬題

案陳公名洎彭城人國朝正史實錄俱無傳然常
以歲月考求公嘗歷知懷州審刑院寶元間自屯
田外郎為副端尋陞臺端已而出漕京西淮南京

東慶厯五年轉吏部外郎加直史館改使益梓路
六年入為度支副使尋轉鹽鐵后山集載皇祐元
年以副使行河還卒今史亦失書信矣史之多散
逸闕遺司馬遷所謂滅功臣賢士大夫之業不述
非此之謂歟儻非因詩卷長留天地間曲阜長道
顏公侯官宏中鄭公而下諸大賢表而出之則公
之景行懿文世之知者益鮮矣雖然公之行事不
得書於史冊得見褒述於諸大賢輯成巨軸於百

年之後又獲歸諸博雅君子之藏使當世士大夫
玩繹歎詠之不足則其榮何必在彼一時之遇乎
嘉定癸酉中秋十七日眉山李塹題

葉清臣

葉道卿近追大旆帖

行楷書
紙本

清臣啓近追大旆久侍緒言下此睽分伏惟企戀伏承
已涓良日據案署事東南千里蒙福此初僻陋小邦日
企餘潤甫憩棠蔭體中若何聽決餘間善輔沖守不宣

清臣再拜七月五日資政大諫天休十兄防閣

范仲淹

范文正公書伯夷頌并札卷

小楷書

伯夷頌

士之特立獨行適於義而已不顧人之是非皆豪傑之士信道篤而自知明者也一家非之力行而不惑者寡矣至於一國一州非之力行而不惑者蓋天下一人而已矣若至於舉世非之而不惑者則千百年乃一人而

已耳若伯夷者窮天地亘萬世而不顧者也昭乎日月
不足為明萃乎泰山不足為高巍乎天地不足為容也
當殷之亡周之興微子賢也抱祭器而去武王周公聖
也從天下之賢士與天下之諸侯而往攻之未嘗聞有
非之者也彼伯夷叔齊者乃獨以為不可殷既滅矣天
下宗周彼二子乃獨恥食其粟餓死而不顧繇是而言
夫豈有求而為哉信道篤而自知明也今世之所謂士
者一凡人譽之則自以為有餘一凡人沮之則自以為

不足彼獨非聖人而自是如此夫聖人萬世之標準也
予故曰若伯夷者特立獨行窮天地亘萬世而不顧者
也雖然微二子亂臣賊子接跡於後世矣 皇祐三年
十一月戊申高平范仲淹書

示諭寫黃素為乾卦字多眼力不逮且寫伯夷頌上呈
此中寒甚前面筆凍欲重寫又恐因循書札亦要切磋
未是處無惜見教

書從北海寄西豪開卷裁窺竦髮毛范墨韓文傳

不朽首陽風節轉孤高戊申後三月有七日許昌
郡齋中題平陽文彥博寬夫

夷清韓頌古皆無更得高平小楷書舊相嘉篇題
卷後蘇家能事復何如壬申歲正月才翁按蔡富
弼題

青州資政寄示小楷伯夷頌許昌相公以詩跋尾
因作詩謝二公兼呈永興觀文相公舜元上

法書遙逐使車還嘉句新從相府頒牢落二賢天

地外

孤竹之二賢

風流三絕古今間
台文競耀高逾麗

化筆交揮老更閒
不用悲吟恐飛去
豈無神物護

重關

轉運度支得青州
資政黃素書韓吏部
伯夷頌許

昌相公以詩跋尾
遂為七言因而寄及
謹用拙篇

紀詠殊上

首陽垂範遠吏部
屬辭深染翰著嘉尚
系言光德

音褒崇亘千襍精
妙極雙金題詠益珍
祕用昭賢

彥心

遠蒙運使度支以資政范公所寄黃素小字韓文
公伯夷頌請許昌文公淮西富公題詩于後才翁
復綴雅什兼寄長安晏公公亦有作衍久茲休退
人事僅廢不意雅故未移悉以副本為貺俾愚繼
之斷此怔忡既感且媿輒爾率強課成拙句奉呈
敢言亦驥之乘聊為續貂之比耳衍上

希文健筆鈔韓文文為首陽山下人寧止一言旌

義士欲教萬古勸忠臣
頌聲益與英聲遠事蹟還
隨墨蹟新當世宗工復題
詠尤宜率土盡書紳

此書皆謗毀艱難者讀之
益以自信故退之希文
尤慇懃耳治平二年五月
六日襄題

河東薛嗣昌亢宗觀

丹陽邵亢獲觀熙寧庚戌
二月庚寅記時領滎陽
舟次泗上

壬辰歲孟春月使車按部
獲一觀焉執中題

范希文好談古賢人節義老而彌篤書此頌時年
六十有三矣癸巳歲夏四月昌朝書

覽才翁家希文手筆伯夷頌輒書短篇於紙尾熙
寧庚戌歲初伏日潁川韓絳子華題

高賢忠義古今同手筆題篇法甚工寶軸傳家當
不朽追懷餘思凜生風

許昌題後及今二紀乃熙寧甲寅之歲仲冬中澣
之日念往懷賢不覺恨恨伊川逸老再題

番陽劉定金陵陳祐甫同觀元豐四年三月廿八日

辛酉季冬九日當世題

潁昌韓縝玉汝屢嘗觀之元豐甲子歲仲秋社日又從安國借看西府東廳書

元祐二年臘月靖恭楊傑京兆慎宗同觀

洛陽郭彭年建安陳昱同觀宣和壬寅夏六月二

十有六日

范文正高風表表文采云為天下後世之仰服蓋
不獨其書也此卷皆元老真儒翰墨使人竦然欽
賞政和四年正月六日濮陽李孝彥跋

皇祐三年侍行于青社時先公書此頌以寄京西
轉運使蘇公今再見手澤不勝悲慕元祐三年六
月十日嗣子守尚書右僕射兼中書侍郎純仁謹
題

崇寧五年純粹得見先公先兄遺墨于潁昌伏讀

久之涕落紙上七月八日謹題

政和丙申孟秋二十八日趙子琥王孝迪同觀于

高平三瑞堂

清江李開晉陵胡唐老同觀

林仲賈公望獲觀戊寅冬十月廿九日記

高賢邈已遠凜凜生氣存韓范不時有此心誰與

論紹興甲寅八月望建康秦檜題

皇祐三年十有一月文正范公在青社用黃素小

楷書韓子伯夷頌遺京西轉運使蘇公舜元蓋天
下萬世大綱常大議論扶植天地不可一日以無
者昔文王三分天下有其二以服事殷伯夷固知
其將終身西伯故辟紂而歸之其心豈遂忘殷哉
一旦武王之師載木主而以王號於其衆非文王
意也兄弟奮然以身為天下萬世爭綱常繼之以
死其事誠卓絕人乃或非之至孔子時猶有以
為怨者而孔子獨曰求仁得仁又何怨至唐時猶

有以為偏而不通者而韓子獨曰伯夷者特立獨
行窮天地亘萬世而不顧韓子之言上繼孔子而
公乎天下萬世有功於綱常甚大時無韓子議論
廢則綱常泯吾為此懼而幸獲睹范公之所書義
士仁人壯顏毅色凜在心目間使頑者懦者一見
且泚汗破膽知畏議論是范公亦與有功於綱常
也公平生自許忠義前後緣論諫得罪至被以誣
謗目以朋黨擯斥遠外而公信道之篤躋而愈奮

老而愈厲伯夷頌固其中素所蓄積者嗚呼皇祐
盛明時公之書此猶義形於色設不幸處綱常之
變當何如若公者真可畏而仰哉大興李侯戡丁
丑歲得此本于燕竭來守姑蘇偕濟南陳君祥汴
梁焦君德明首謁公祠下訪問其子孫而以畀之
尊賢尚義有如此公之孫邦瑞士貴敬受而藏不
啻拱壁始其家嘗以摹本刻于義莊歲寒堂至是
乃得真蹟於二百四十八年之後若有神物護持

以待其子孫而後付殆匪偶然二君議勒石傳不朽而邦瑞主宗祀顧我於霄上道輒具論顛末俾以刻晏元獻杜正獻文忠烈富文忠蔡忠惠諸賢與公忠義相期各有題賦而蘇公詞翰氣概又公所重宜併刻于後若昌朝執中輩雖素有抵牾亦不以人廢焉抑予觀忠宣公兄弟有感手澤言泯意外志念深矣尤後人所當取則二君皆有典刑文學能亢其宗族黨所共推尚帥其族之人與其

子弟謹守此寶圖繼其志用衍忠義之傳其永永

無數大德四年二月初吉陵陽牟巖書

真蹟上無而邦瑞至

雪上道凡

十二字

豫章先生集有此帖跋云范文正公書伯夷頌極得前人筆意蓋正書易為俗而小楷難於清勁有精神如斯人不必以書立名來世然翰墨乃工如此蓋喜多能雖大賢不免焉志仁伏讀諸名公所題大篇短章於伯夷之清風昌黎之偉詞文正公

之寶墨賢侯歸帖之美聞孫承家之懿藻繪盡矣
尚何辭之措敬書山谷此跋以補缺遺又山谷嘗
跋公真蹟云范文正公書落筆痛快沈著極近晉
宋人書往時蘇才翁筆法妙天下不肯一世入惟
稱文正公書與樂毅論同法老年觀此書乃知用
筆實處是其最工想其鉤指回腕皆優入古人法
度中此跋首述才翁所云於寫伯夷頌亦相關涉
因牽聯書以歸之竹趣先生晚學清江羅志仁拜

手

文正公所以師表百世者固不在書然筆法之妙
自足追媲古人故蘇公號稱能書者亦從公求之
以為珍玩焉書此頌時已六十有三距公薨才一
年耳而楷法謹嚴一筆不苟如此真可敬而仰哉
夫書雖細事而最足以觀人公書如是中之所存
可知已同時如文富韓歐諸公書之工拙雖或不
同而其渾厚端莊則亡以異此四五公者坐廟堂

邦其有弗久俗其有弗醇者乎世稱王荊公書如
斜風急雨其胸中躁擾可以想見一旦當國遂盡
取成憲而紛更之天下騷然而風俗亦一變而趨
於薄矣厥後溫公復古而國再安章蔡崇新而世
遂亂其正與邪皆莫逃於筆墨之間益信心畫之
說不誣然究其大歸則熙寧以前之書多重厚而
少輕浮熙寧以後之書多輕浮而少重厚茲蓋世
道之所以升降者予嘗從故家盡得宋南渡前墨

蹟觀之而竊為之說如此故并識之俾來者有考焉大德庚子六月乙巳朔陵陽牟應龍敬書

文正公為蘇舜元書伯夷頌名公題贊甚富二百年間不知凡幾傳至於賈秋壑宋亡北流於燕逸齋李侯時為部侍郎得之寶藏文府大德戊戌侯自兩淮都轉運使來守是邦謁公祠下求公之後人以與之侯盛德也衍奉檄來姑蘇理海舟之獄范氏之族長竹趣先生出示幸獲觀焉大德庚子

秋七月小子李衍再拜謹識

夷齊之論至夫子而定或謂得夫子而名益彰二
子求仁得仁名之彰與否不暇為身後計也退之
之頌賢於司馬遷附青雲之見遠矣按文正公在
青社皇祐三年十一月書此未幾以病請汝陰明
年五月薨於徐其平生特立獨行之志夷險一節
老且死不變而見於心畫者如此與守桐廬日祠
嚴子陵同意清風凜乎其相廟也時文潞公罷相

知許昌杜祁公為賈昌朝所抑致仕去富鄭公准
西晏元獻京兆諸賢在外詞翰往返瀟灑高潔語
出意表視夷齊異世同調所恨者公方向用而即
世矣後三年文富並相使公而無死天章一疏盡
行豈有熙寧之旤哉蔡忠惠治平三年五月之題
謂此書皆毀謗艱難者讀之益以自信是年忠惠
為三司使給事以讒出守杭故云爾意謂公屢遭
擯沮蓋夷齊其行而世或有非之者遂借此以自

見然公知有直道而行而已豈自必於夷齊哉自
必於夷齊亦未免有所利而為之矣天荒地老崑
玉不燼宛其復歸與義田并傳君子之澤通乎盈
虛之運幽明之故正不偶然也片紙三百年承平
碩輔姓字皦皦如日月見之東衽盤辟若檜若似
道亦強其間使人指畫唾罵然則士不以夷齊自
厲其不為文正公之罪人者幾希雖然亦豈願其
為夷齊哉大德庚子日長至長樂郭陞拜手謹書

文正范公細書昌黎公伯夷頌石刻在建業玉麟
堂墨蹟流傳大德己亥復歸于范氏庚子歲九月
過吳中獲觀拜手敬贊餘杭盛彪 百世之師維
孤竹氏六經之文維子韓子不有斯文孰繪厥皞
維高平公高山仰止素書鈇鋒義獻是似匪翰匪
墨為綱為紀去珠斯還良玉不燬有物護持復歸
于是庶幾寶之有永千祀

吳興趙孟頫子昂高郵龔璘子敬同觀

伯夷之行昌黎頌之文正書之真三絕也子孫其寶之哉真定董章

汲郡王簡漢東孟淳同觀大德乙巳夏五十日

文正范公手澤獲見於二伯六十三年之後扶植綱常流傳是寶濟南王文羽保定孫杲同觀時皇慶二年歲在癸丑暮春大名王亢宗識

文正范公文武忠孝親親仁民之德充周穹壤是以尺素寸楮觀者斂衽曹操王敦桓溫未嘗書不

佳也至今見者唾之公所書伯夷頌流入秦檜賈
似道家繇賈遂沒入官宋亡出於燕趙間復歸吳
范氏世所共貴重者有在也熙寧以來見者必著
姓名豈欲託以不朽耶苟不知觀感興起之微求
公之心希公之德徒珍玩是誇亦秦賈耳不幾於
狎大人乎凡我同志相與勉焉泰定丙寅七月十
九日天台後學楊敬惠書

古人尚友以其類也伯夷之心惟孔子為能知之

千載而下惟文正范公有以似之文正之心惟朱
文公為能知之千載而下其亦有似之者乎嗚呼
希矣至順壬申夏五月宛平曹鑑拜手謹書

文正公以寶元元年赴潤道謁狄梁公廟為之作
記立碑又十三年皇祐三年鎮青社用黃素小楷
書伯夷頌寄蘇才翁蓋去公薨半歲耳於是公屢
以言事忤旨出殿外服知其道之莫可行也將以
仰希古人而於伯夷之清風梁公之大節竊深慕

焉攬公之迹可以諒公之心矣所謂百世以俟聖人而不惑者茲非其徵乎東陽柳貫謹題

右宋推誠保德功臣贈太師中書令魏國范文正公書唐韓子伯夷頌真蹟筆意精嚴動合法度有晉人之遺風熙寧以後名公題識具存誠寶玩也按公書此頌遺武功蘇舜元南渡後歸秦檜氏又歸賈似道氏宋亡流入北方李侯戡得之京師來守吳實魏公之鄉因謁公遺像以其書歸其後之

人今藏于范氏義莊子孫世守之竊嘗謂時有代
謝世有盛衰至於天理民彝則越萬世而不可泯
者必有人焉王侯之貴晉楚之富死生之大舉不
能以動其心乃足與有為也太史公纂史傳思可
以厲節義維綱常者許由務光之倫其事不經得
孤竹君之子遂為數千載人物稱首遷之志念深
矣唐韓子探其微旨著伯夷頌文正公復得韓子
之旨而為之書蓋公屢以忠讜不容於時遭誣擯

斥守道彌篤所謂不動心以有為者其在斯人歟
夫聖賢所遭之時雖異至於厲節義維綱常而天
理民彝賴之而不泯者則一而已故觀此書者莫
不興起書云乎哉贊曰 於昭民彝不億而泯肅
肅元夫厥德孔純弗移弗屈執中允固思皇九有
克寧無斃民不可乏主我不隕厥清匪茲元夫日
離亂爭此何人斯孤竹之子非其君不事非其民
不使韓侯作頌郁郁其章魏公書之翼翼其相死

生弗渝是式是似曠代同心惟予與爾人獲遺書
如圭如璠懷德不替來歸其孫維魏公孫子永保
勿失惇我風化尚祚皇國後學柯九思拜手謹書
古之君子之於學也至於成已成物其於天下國
家則曰功成治定所謂言之必可行也行之必可
言也蓋物格知至而至於國治天下平者如此非
苟以為言而已世之君子何其言之詳而卒不見
其成功耶若文正范公則所謂能言之而能行之

者也觀其所書韓子伯夷頌豈特筆墨之妙其為萬世之慮也深矣後學京兆杜本敬觀

魏國文正范公在宋朝為名臣稱首當時論者或直以為聖人或方之以夔禹是豈泛然而為之言哉觀魏國出處始終大節一合乎道其豐功盛德煥乎簡冊若日星之不可掩山嶽之不可齊與天地相為悠久其窮理盡性以至於命者與今觀魏國所書伯夷頌筆法森嚴直可與黃庭樂毅等書

相頡頏是則魏公非特於德行功業超然傑出其
於書法亦造乎其極者也然公不他書而書韓子
伯夷頌者尤見公切切於綱常世教未嘗一日而
忘也披玩再三令人斂衽起敬至元三年後丁丑
歲秋九月望後學台哈布哈謹書

首陽高節退之頌之吏部文章文正書之時稱為
三絕趙宋諸賢及有元之材大夫士題詠之不少
置其八世孫靜翁裝潢而珍襲之求名筆以發其

光華信可寶已余嘗私竊論之伯夷以特立獨行之節不待退之頌之而可顯唯得退之頌之則其節為益顯吏部以日光玉潔之文不待文正書之而可傳唯得文正書之則其文為益傳故伯夷之節唯知適於義而已初不計後之頌與否也退之之頌深以為亂臣賊子不守名節者之戒初不計後之書與否也三者無心會而為一虹光渥彩昭如日星之垂天使世之亂臣賊子未為者而觀此

書此頌則神駭心悸而不敢肆其惡已為者而觀
此書此頌則膽落魄喪而無所逃其罪其有功於
世教大矣且文正以清才茂行為時名臣先哲稱
其事業滿邊陲忠義滿朝廷聲名滿天下則字畫
乃其餘事然猶莊楷遒麗過人如此真趙宋第一
流人物也余適以事過吳伏謁祠下靜翁持成卷
示予故欣然書之以俟夫知言者得焉薊丘韓璵
載拜

伯夷頌首云士之特立獨行適於義而已不顧人之是非皆豪傑之士信道篤而自知明者也此數語已足盡伯夷之心文正公親書此頌匪惟知之亦允蹈之觀其立身大節亦不顧人之是非信道篤而自知明者豈非豪傑之士哉其裔孫靜翁先生恬愉樂道獨能保有斯文而珍藏之觀此者千載清風俱凜然矣後學永嘉鄭僖再拜書

范文正公所書伯夷頌後有秦會之太師賈師憲

太傅兩人圖記宋南渡後此卷必流落江左而嘗
入其家至李侯戡得之於燕則宋亡之明年也范
氏所居近在吳中兩人不能舉而歸之卒有待於
李侯而公之子孫乃獲敬受寶藏焉豈偶然哉蓋
自西方兵寢不用公歸而均逸外藩因得以暇日
游心於藝事才翁善書而深服公楷法之妙求公
寫乾卦而公以字數多眼力不逮故為寫此頌卷
末第云書法亦要切磋未是處無惜賜教而已後

來一二大老又推廣其說謂公書此實為天下萬世綱常計至哉言乎不容復贊一辭也至正七年春正月甲子後學黃潛敬觀

宋范文正公書唐韓文公殷伯夷頌想其清風勁節德行文章真希世之三絕也元初平江太守李侯戡得之中原歸之范氏子孫可謂劍出豐城珠還合浦李侯其亦仁人之心歟展玩之頃頓覺忠義之氣凜然在天地間令人毛髮竦立宋朝十相

景仰之忱藹然見於言辭之表秦賈二公猶加企敬而珍藏之度其心寧無所愧大明兵至義莊祠宇俱為灰燼此卷同罹此患覲必不存大宗孫廷珍十世孫天倪復購之於軍砦中嗚呼公之靈在天天祐其忠俾公之手澤不泯於世是知公之遺澤未艾也雖生二伯載後而獲觀覽猶青天白日景星鳳皇快平生之心目也河東後學王雖拜書韓文稱頌伯夷賢黃素真書慶厯年月照明珠還

合浦春風長共義莊田至正甲申六月辛未燕山
圖列圖再拜

伯夷古賢人昌黎追作頌文正小楷書尊仰世所
共李侯吾故人收藏萬金重適來尹平江范氏覽
陪從一日拜祠下歸諸子孫用三賢固自佳侯德
亦堪誦再拜書五言心薌辦清供大德己亥四月
十五日曹南馬紹書於平江旅次舟中

長白山中名相出首陽山下若人賢古今如此能

多少歲月相望越二千遺墨來從新畫戟故家復
取舊青氊偉哉君子無窮澤留得餘芳奕世傳嘉
興張伯淳謹題

班固人表吾嘗疑第一武王二伯夷我謂伯夷可
第一武未盡美宜二之退之第一唐文人希文第
一宋輔臣韓為夷頌范為寫三絕誰歟什襲珍星
奎運餘三百年皇祐慶厯諸鉅賢逮至渡江乾淳
後珠題玉跋盈長編

名士題跋不一

范氏衮衮饒公侯

丞相

忠宣公純仁以下

幽州枯州至蘇州

范氏本幽州良鄉人遷枯蒼今江浙提學

君澤居處州是文正始居姑蘇

行軍元昊驚破膽義莊睦族春復

秋子子孫孫居吳中

族長主祭今七世孫邦瑞也

指李後人今

黃龔

謂平江使君李公信之逸齋

錦囊偶貯此三絕燕香夜寒

吐長虹衮衣繡衣觀且誇

衮衣謂右丞馬公性齋繡衣謂陳廉訪君祥完

顏廉訪正卿

故國喬木興咨嗟大尹不吝歸趙壁祠以

少牢復其家提學翰林索我詩

謂君澤自玉堂外補

肯捐此

寶真復奇授者良難受者易即此可刊遺愛碑大

德庚子春上丁之明日紫陽方回萬里

詩內
自注

企清風兮薇山之陽寶芳帖兮薇露之香意人世
不可以久留兮雷霆下而取將幸鄴侯之巾襲兮
儼墨蹟之未亡把一麾而東來兮文正之鄉喬木
蒼蒼兮蘭菲菲其彌芳嘉先正之有後兮偉德澤
之長出此帖而歸之兮甚魏笏之輝煌時不可兮
再得勉世世兮珍藏天台柯謙

名並日星真細事義參天地在彝倫寥寥千古空

遺蹟薇滿西山意自春

伯夷清節韓公頌范老銀鈎韓子傳屋壁遺書還

孔氏誰人得似使君賢 金華胡長孺

范文正公黃素小楷昌黎伯夷頌蓋在青社時所
書以遺京西轉運使蘇公舜元者也後二伯年大
興李侯戡得此本于燕及南來守吳乃文正公鄉
里即訪公子孫以畀之范氏喜而求詩為賦

有耳不聽下里巴人有手不寫劇秦美新天生靈

物寄我體可惜穢棄同埃塵清風百世希文老一
字流傳今是寶誰知堂堂伯夷頌曾借春暉發枯
槁韓子也復英雄姿冰寒斗峻餘文辭吹噓自起
北海隱膾炙聊慰西山饑天荒地老精靈在處處
江湖虹散彩書離孔氏忽自歸金遇龔侯如有待
世情愛古兼愛奇書奴滿眼非吾師請君焚香盥
手拜此帖歸洗人間兒女癡剡源戴表元再拜
小楷青州三絕碑復還范氏事尤奇不知百世聞

風者更有何人似伯夷

古今一理是綱常
范筆韓文妙發揚
公餓首陽元不死
春風歲歲薔薇香
錢唐仇遠再拜

退之嘗作伯夷頌
綱常更為文章重
小范老子翰墨香
吹醒首陽千古夢
爾來宇宙三百年
劫灰不壞寧非天
姑蘇李侯賢太守
為將手澤歸雲玄
因憶右軍修禊叙
智永藏之固其所
今比蕭翼誰賢愚
豪奪何如能樂與
君子於物不留意
好德終然

勝好古劍許徐君自有心書還孔氏非無故粟可
不食國可辭較之一紙真毫釐聞風廉立遽如許
信哉聖人百世師西山之薇何獨美向微二子一
草耳東海魯連死猶生中書馮道生猶死承平文
獻傳至今品題先後如盍簪就中何人合媿死九
錫不是夷齊心楚北村民湯炳龍題

逸齋相公總管以所藏文正公書伯夷頌歸于范
氏懷賢尚德之心士大夫皆樂道之為詩若文盈

軸甚盛事也不揣蕪陋僭賦小詩高沙龔璠拜手
一時端合拯斯民萬世寧無啓不臣此意聖賢非
二致誰令今古共龔倫墨胎事遠頌聲在青社人
抄楷法新尺素郡侯還范氏先憂天下亦同仁大
德庚子二月廿一日書于義宅之西序

海濱二老本同歸末路殊塗孰是非扣馬匆匆扶

義士闕憐未識首陽薇

韓辭范筆照千齡扶植綱常似六經日月爭光宜

下拜莫將此眼對蘭亭 眉山史孝祥

先哲吾師表斯文古鼎銘義形扣馬諫書勝換鵝
經故事徵皇祐鄉祠謁仲丁登堂覩遺墨山雨颯
英靈

心田垂世遠手澤歷年殊誰購山陰序真還合浦
珠身惟名不朽書與道同符諸老珍題在猶堪立
懦夫 蜀後學鄧文原頓首

伏承主奉范君出示先世書詔及文正公手書伯

夷頌令集題識仰惟前賢爭光日月不敢妄有贊
述輒以鄙句奉謝用表惓惓景慕之意云耳蜀郡
虞集頓首

慶厯元臣細字書清風直與伯夷俱潞韓并識何
春應秦賈爭藏實蟻汙神物護持天愛寶子孫驚
喜海還珠敢以微塵贊喬岳願推餘論砭頑夫

企仰前賢歲月深阿衡事業伯夷心義田猶是當
時祿遺象能令百世欽竊頌詩書求彷彿默嗟人

物轉銷沈誰人漫浪矜家世看取天平萬石林

敬題文正公所書伯夷頌卷尾長沙湯彌昌頓首

再拜

頌文遙附青雲傳楷法獨推黃素書百世清風元
不泯兩公高志更誰如珠遺舊入權臣橐壁返今
逢刺史車一卷寶藏同魏笏虹光清夜燭寒虛

翰墨嘗託文章傳文章益重節義全使無節義照
今古文章翰墨空嬋娟特立獨行不顧衆萬世標

準權亦用吏部雄文破鬼膽為渠喚醒西山夢范
公相望餘千齡人物自與皋夔并黃素細書伯夷
頌白頭不草太玄經一字千金價無讓虹光夜徹
星斗上夷清韓頌高平書再拜莫作文翰想奸臣
襲藏猶畏仰面無生色泚流顙珠還擅復子孫賢
我信斯文天未喪佳辭善書常有餘嗚呼節義不
可一日無致和元年中秋日金華後學胡助再拜
謹書

文正千年士精忠凜不亡
勲名山嶽重翰墨日星
光喬木參天古幽蘭疊砌芳
我來拜祠下端欲濯
滄浪高昌偈玉立再拜

孤竹身為百世師
范公手染退之辭
不知青社揮毫日
得似天章論道時

鐵畫銀鈎黃素帖
珠還璧返歲寒堂
須知此事關風教
子子孫孫盡寶藏
吳後學干文傳再拜

青青首陽薇皎皎孤竹子
求仁亦何怨清風千萬

祀昌黎述玄聖雄文劇頌美偉哉青社書感激有
深旨列宿麗寒旻羣鴻戲秋水李侯信卓犖不惜
百金市分符守吳會開緘授雲耳故物傳衛公遺
璧歸孔氏一玩三歎息當思繼前軌元統乙亥三
月壬寅新安汪澤民再拜

外錄

書畫舫云文正范公小楷伯夷頌黃素真蹟上上
詳其結構蓋清勁品也左方宋元人題識甚多世

謂首陽之節韓子之文與文正之書同為三絕范氏子孫嘗模以刻石真筆今存義莊

文正公道服贊帖

道服贊

并序

平海書記許兄製道服所以清其意而潔其身也同年范仲淹請為贊云

道家者流衣裳楚楚君子服之逍遙是與虛白之室可以居處華胥之庭可以步武豈無青紫寵為辱主豈無

狐貉驕為禍府重此如師畏彼如虎旌陽之孫無忝於祖

希道比部借示文正詞筆觀之若侍其人之左右
令人既喜而且凜然也熙寧壬子孟夏丙寅陵陽
守居平雲閣題石室文同與可

獲觀文正公之詞翰淳重清勁如其為人每展卷
諷誦未嘗不想見風采何名德之重使人愛慕如

此其深也富川吳立禮題

隸古
書

竊觀范文正道服贊文醇筆勁既美且箴以盡朋
契之義有以見高陽公之德矣傳曰不知其人視
其友諒哉熙寧壬子年十一月甲子吳興戴蒙正
仲題

魏文正公祥符八年進士也其為同年許比部作
道服贊辭莊義舒慤乎有德之言哉南北分合餘
二百年而員幅疆理復混為一區公之孫曾嗣守
先業不懈益恭得公書遺蘇才翁韓文公伯夷頌

真蹟而寶蓄之且摹刻于石今年至正元年益都
宗人復自北攜此贊併公侍祠像來南而歸之合
浦之珠曲阜之履得於既失所以委重宗祊藩飾
世緒者夫豈偶然之故有相之矣熙寧間文公與
可題識云希道比部而不著其名宋登科記當自
可考也卷中有東漢太尉祭酒家學印高陽及仙
系小印皆緣許氏則是贊之為許氏物蓋已久矣
不知何時而遂失之也耶作贊時許公為平海掌

書記耳熙寧始轉至比部其恬於進取如此於以
見許公亦盛德之士不然公豈肯輕以清其意潔
其身者而許之哉昔公書伯夷頌以遺才翁今復
見公為希道謨書此贊則希道亦才翁一等人哉
宋三百年文運休明泰治熙洽自景德祥符而始
盛觀公此贊則公與許公之聯芳科甲信人才與
時升降者為不誣矣元年冬十有一月二十七日

東陽柳貫書

文正公為同年友許書記作道服贊言皆至理書
特清勁至今觀之悚然增敬所謂寵為辱主驕為
禍府重此如師畏彼如虎是又美不忘規益可玩
味乃知異時丞相堯夫布衾銘實權輿於此歟然
是贊不載文正集中則公之文之遺者有矣抑亦
盛年之作而或失於編次也耶因綴廿字以寓景
行之意云文正道服贊忠宣布衾銘家乘揆一德
名德符六經至正癸未春正月廿日金華胡助書

外錄

書畫舫云文正公楷書道服贊為同年許希道書
記作有文同以下題跋亦見之義莊文徵仲為摹
刻停雲館帖中

文正公與翰長帖

仲淹再拜翰長學士伏惟起居萬福昨張去惑著作來
捧真誨備荷勤意欲其委順保全不宜擇處也仲淹非
不思之寒儒之家世守廉素恐門戶一變有勃出勃入

之禍況邊上乏人且勉於從事或稍寧息或得將帥即有丘園之請以全苦節養生俟死此其志也俞旨一下魂神來復久而無營知非他望明公諒之近以北事謁見賢者今聞彥國之好不復言之亦甚減憂未拜奉間惟見自重不宣仲淹拜上翰長學士座前中秋日

答翰長學士帖不知為誰作也言近以北事謁見今聞彥國之好亦甚減憂蓋慶厯中鄭公再使契丹和好始定中國於是息兵垂五十年公之先憂

後樂為何如哉彥國鄭公字也所云邊上乏人且
勉從事或稍寧息即有丘園之請則公為西帥時
耳至恐門戶一變有勃出勃入之禍不惟公家子
孫所當服膺而凡士大夫皆當寫置坐右以比盤
杆几杖之戒者也至順四年夏六月晦東陽柳貫
道傳識

文正公作此帖以復翰長學士雖莫詳其姓氏要
是一達官無疑若張去惑著作則嘗游公門從事

幕府公薨背時為淮南轉運使見於祭文可考也
公之片言隻字流落人間者學士大夫咸以為法
況其辭旨及於家國者乎嗚呼邊上乏人西北之
憂後世卒不免此又志士仁人之所為深慨者也
元統二年春正月九日後學金華胡助敬題

慶厯間契丹乘中國有西警議入寇遂命富鄭公
使遼卒定和議時文正公以西事知慶州此書與
翰長所謂聞彥國之好亦甚減憂者即其時也書

中又言有丘園之請以全苦節然其後與韓公並
安撫鄜延又除副樞密拜參知政事以讒媚出使
河東知邠州復知鄧而杭而青而潁丘園之請竟
不獲遂其志而薨獨所謂全苦節者貫始終厯夷
險而不渝也嗚呼大忠皋夔元功方召炳然大節
照映今古又何其盛哉至元四年後戊寅十有一
月望日後學永嘉鄭僖敬題

文正公許下帖

仲淹啓昨日至許下行次領真誨承動止無恙兼示及
省勝兒子與李教授謝家弟兄王七俱過省親識中得
失相半更三五日必見春勝也漸遠風音黯黯為戀惟
多愛不宣仲淹上欽聖殿丞左右三月十一日 今日
相國筵會不暇子細保愛愛或有書入京遞中即易達
也

尺楮逾二百載魏公手筆如新語不繁而意足可
以想見其人湯彌昌敬題

右文正公聞子弟過省答友人書若固有之視利達為何如哉與常人外飾遜避之辭中懷僥倖之意不可同日語覽者默識於辭意之表亦足以感發矣天台楊敬惠拜觀謹識時至順壬申人日

此行次許下答欽聖帖中云示及省勝兒子與謝家兄弟俱過省兒子即忠宣忠宣皇祐元年進士公以慶曆八年由鄧州求守杭明年三月十一日次許得書正南省放進士時也欽聖不著姓今亦

莫可考而籤題蔡欽聖必有據哉東陽後學柳貫書

初留吳郡城中每從范靜翁先生閱其家藏文正公手帖凡若干卷今又得許下帖讀之富哉范氏之藏也靜翁先生力承宗緒至老彌篤凡遇其先公片紙隻字即購藏之以為家寶嗟乎公之翰墨留天地間如精金美玉人咸知愛重而況公之孫子哉是宜先生之寶之也使子孫之來者皆如先

生之用心焉則公之遺澤將百世不泯矣蓋相與
懋戒之至正十年歲在庚寅夏五月後學茶陵李
祁謹題

文正公與師魯二帖

一紙高尺餘長一尺七寸
一紙高尺餘長一尺三寸

仲淹啓熱中得回問知漢東尤甚然西洛上京皆苦熱
宣下開井救渴者此可知矣三兩日來因雨微涼彼亦
然矣折支已差人許州般取到即走報不易易請見錢
者猶煎熬不足蓋日給外月月有橫費處家家如之邠

酒四瓶近寄來請收檢鄧醞已竭候新者送去合得花
蛇散空心可日一服甚有功恐疑之和方寄上希多愛
多愛不宣仲淹上師魯舍人左右七月十四日 新牧
舊識候到即有書去兼是棊侶也先託伸意

仲淹頓首李寺丞行曾奉

闕

削遞中亦領來教承動止

休勝仲淹此中無事

闕

兒子病未得全愈亦漸退減田

元均書來專送上近得

闕

揚州書甚問師魯亦已報他

貧且安也暑中且得未動亦佳惟君子為能樂道正在

此日矣加愛加愛不宣仲淹上師魯舍人左右四月二

十七日

方范文正因與呂文靖爭論上前貶饒州時尹舍
人實上書願得俱貶監郢州酒稅此一卷帖情義
諄諄不啻兄弟蓋二公愛君憂國道合志同其相
與之厚自應爾耳淳熙乙巳清明日梁谿尤袤敬

觀

此跋後
收入

師魯自均州輿疾至南陽託范公以死蓋平日之

相子者如此四明樓鑰書紹熙三年十月晦日

范公二帖皆是師魯謫漢東時書後一帖却當在前或是自均過鄧託范公以死時問訊之書與衆云云之戒可見也賢者困厄至此人到于今傷之藏之深固之密石可朽名不滅歐公銘文盡之矣
洪邁書

佳客千山得得來主人雙眼為渠開逢人莫說當時事且泊南亭把一杯
右第二紙當是尹自均

來訪范於南陽時也范戒尹以不須與衆云云此
意最深淳熙戊申三月廿八日廬陵楊萬里敬書
靜翁近又收得此二帖乃文正公與尹師魯書也
交情古誼百世之下尚可想見視它帖尤當珍愛
學士大夫所願見而不可得者況尤樓洪楊四公
之題識亦豈復可得哉賢子孫永宜寶之至順四
年五月五日後學東陽胡助謹書

景祐二年公上論遷都事與呂文靖異議黜知饒

州祕書丞集賢校理余靖言加罪言者非太平之
政坐落職監均州酒稅而太子中允館閣校勘尹
洙又言范某義兼師友乞從降黜亦坐貶崇信軍
節度掌書記監郢州酒稅此二帖皆尹公在郢時
所遣問若曰日給外月月有橫費家家如之至於
收檢郤酒候送鄧醞合花蛇散和方送上見朋友
有救卹通財之義而惟君子樂道為能盡之也其
後公鎮鄧尹公再貶監均州酒稅昇疾來鄧以存

歿託公則公之於尹公可謂生死不易其諒矣然
楊洪二公跋語以第二帖是自均來南陽時且有
不須與衆云云之戒今帖中乃無此語然以動止
休佳及報他貧且安也等言證之則非疾時矣恐
此跋非此帖也前帖鈐縫有王厚之順伯陰文十
六字印知為順伯所藏順伯臨川王和父之孫好
古博物為中興第一徽文公與之友善集中載其
書問可考也田元均諱況蓋諡宣簡云東陽後學

柳貫謹識

尹公自謂與范公義兼師友而其言談罕及於性命至尹公處生死之變尤人所難及非知道者不足以與於此蓋是時風俗醇篤士大夫多不言而躬行未至立名字以相高此宋三百年極盛之際也伏觀范公遺帖安得不為之撫卷而三歎乎至正七年春正月甲子後學黃潛敬觀

范公與尹舍人往還書一卷當有與衆云云帖而

逸之觀洪楊二公跋語可知也後人不見此帖乃
改跋中三字作二字耳覽者當能辨之元統乙亥
春三月壬寅新安後學汪澤民謹書

范文正公以論事忤執政遂落職知饒州于時直
范公者相屬於朝尹師魯亦自請同黜可以見一
時賢才之盛矣師魯既貶監郢州稅觀魏公二書
中語畧不及當時事亦不以師魯因已被黜而加
存問蓋范公所論為國也而師魯之請以義也是

豈有一毫私意於其間哉書末云惟君子為能樂道前賢之用心於此可見矣二帖筆力遒勁有晉人遺意尤非泛泛於書者范氏其世寶之至正三年後丁丑歲秋九月望後學台哈布哈書

景祐四年文正公既以言呂夷簡出知饒州尹公師魯亦貶監郢州酒稅慶厯四年尹為涇原經畧以爭城永洛事為董士廉所訟再貶均州監稅時文正公在政府也踰年公出知邠州又改鄧州此

二帖蓋在鄧與尹者夫以尹公之賢文正公於其
存也通以書而盡其慰問之誠歐陽公又於其沒
也為之銘以致其痛惜之意好賢樂善固如此哉
至元四年後戊寅十有一月望後學鄭僖書

文正公與尹師魯帖詞翰俱不易得名公題跋又
盡美愚何幸身親見之成化辛丑六月廿日高唐
劉魁拜識

尹師魯何如人而克致范文正公之敬愛若是耶

余嘗考之師魯以靜退為樂以古文矯俗其行高
學古可知已及觀文正公黜知饒州師魯請同降
黜其臣節友誼又可知已宜其為文正公之所敬
愛簡帖往還契之若金蘭而友之若兄弟也噫觀
文正遺翰流芳千載一日師魯之名得與同垂不
朽亦何幸哉成化辛丑八月八日句曲戴仁敬題
宋盛時有西夏之擾范公與尹師魯合謀戮力以
抗之相得甚深蓋以道義事功為友者也此二帖

與師魯者其一已刻文正尺牘中寬嘗閱之何幸
今日復獲見此真蹟哉然二帖不藏於尹氏顧歸
於文正子孫則其後世之盛衰亦可知矣鄉後學
吳寬謹書

范文正公與尹師魯舍人二劄蓋家人寒暄語耳
未幾而為師魯經紀身後志其遺行至今為士林
所稱則君臣父子朋友之道此實基之故不當以
書家論也跋者如宋洪文敏邁之博學樓宣獻鑰

楊文節萬里

明

吳文定寬之學行元柳待制貫黃

文獻潛之詞執汪文節澤民台哈布哈忠介之死節
皆卓然名縉紳與二公風猷節概固有相感異代
者敬為識之攷胡古愚跋稱尤樓洪楊尤是文簡
公褒錫人也以祕監終得謚文簡豈潭池脫落時
佚之耶萬厯己卯秋日後學王世貞敬書

文正公動止帖

草書宋
蠟牋

淹啓一二日動止佳否所苦必已痊損矣餘錢欲輟五

千省如何屑々千清聽甚愧悚也淹上竇得閣下乳
香石上納以好醋磨塗赤腫處

外錄

書畫舫云按文正書法入妙故涪翁極推轂之或
謂公書以人重非所以語于知音

范純仁

范忠宣公日企軒馭帖

行書
紙本

念者日企軒馭之來以釋煩渴天氣斗寒必已倦出應

且盤桓過冬況伯康初安諒難離去咫尺無由往見豈
勝思仰之情更祈以時倍加保重其他書不能盡純仁
頓首上伯康君實二兄坐前九月十一日

范純粹

范德孺不見故人帖

行書
紙本

純粹啓久不見故人每以依仰東吳山水之國風物秀
麗食飲佳嫩想全翁甚樂之也純粹守此五年矣比再
滿才歲餘耳淺拙自力無足言者親老得此地涼疾體

稍便二家兄到晉數得書三家兄且安職然去意常在
也何當款語以紓遠情餘非此可道也純粹上

張昇

張樞相滿江紅詞帖

無利無名無榮無辱無煩無惱夜燈前獨歌獨酌獨吟
獨笑況值羣山初雪滿又明月交光好假便饒百歲擬
如何從他老 知富貴誰能保知功業何時了算簞瓢
金玉所爭多少一瞬光陰何足道但思行樂常不早待

春來攜酒殢東風眠芳草 右滿江紅景卿張昇

沈 邁

沈文通屯田君帖

行書
紙本

屯田君士林之英方當進用於朝遽茲棄化衆所嘆也
友于之情奈何孔子稱仁者壽云者不以年也謂聖
人達死生之理而若常存之爾明哲深珍是庶可不傷
於性焉邁上

劉 敞

劉原父書南華秋水篇

秋水時至百川灌河涇流之大兩涘渚崖之間不辨牛馬於是焉河伯欣然自喜以天下之美為盡在己順流而東行至於北海東面而視不見水端於是焉河伯始旋其面目望洋向若而歎曰野語有之曰聞道百以為莫已若者我之謂也且夫我嘗聞少仲尼之聞而輕伯夷之義者始吾弗信今我睹子之難窮也吾非至於子之門則殆矣吾長見笑於大方之家北海若曰井鼃不

可以語於海者拘於虛也夏蟲不可以語於冰者篤於時也曲士不可以語於道者束於教也今爾出於崖涘觀於大海乃知爾醜爾將可與語大理矣天下之水莫大於海萬川歸之不知何時止而不盈尾閭泄之不知何時已而不虛春秋不變水旱不知此其過江河之流不可為量數而吾未嘗以此自多者自以比形於天地而受氣於陰陽吾在於天地之間猶小石小木之在大山也方存乎見少又奚以自多計四海之在天地之間

也不似罍空之在大澤乎計中國之在海內不似稊米之在太倉乎號物之數謂之萬人處一焉人卒九州穀食之所生舟車之所通人處一焉此其比萬物也不似毫末之在於馬體乎五帝之所連三王之所爭仁人之所憂任士之所勞盡此矣伯夷辭之以為名仲尼語之以為博此其自多也不似爾向之自多於水乎河伯曰然則吾大天地而小毫末可乎北海若曰否夫物量無窮時無止分無常終始無故是故大知觀於遠近故小

而不寡大而不多知量無窮證彙今故故遙而不悶掇而不跂知時無止察乎盈虛故得而不喜失而不憂知分之無常也明乎坦途故生而不說死而不禍知終始之不可故也計人之所知不若其所不知其生之時不若未生之時以其至小求窮其至大之域是故迷亂而不能自得也由此觀之又何以知毫末之足以定至細之倪又何以知天地之足以窮至大之域河伯曰世之議者皆曰至精無形至大不可圍是信情乎北海若曰

夫自細視大者不盡自大視小者不明夫精小之微也
埒大之殷也故異便此勢之有也夫精粗者期於有形
者也無形者數之所不能分也不可圍者數之所不能
窮也可以言論者物之粗也可以意致者物之精也言
之所不能論意之所不能察致者不期精粗焉是故大
人之行不出乎害人不多人不多仁恩動不為利不賤門隸貨
財弗爭不多辭讓事焉不借人不多人不多食乎力不賤貪汙
行殊乎俗不多辟異為在從衆不賤佞諂世之爵祿不

足以為勸戮恥不足以為辱知是非之不可為分細大之不可為倪聞曰道人不聞至德不得大人無已約分之至也河伯曰若物之外若物之內惡至而倪貴賤惡至而倪小大北海若曰以道觀之物無貴賤以物觀之自貴而相賤以俗觀之貴賤不在已以差觀之因其所大而大之則萬物莫不大因其所小而小之則萬物莫不小知天地之為稊米也知毫末之為丘山也則差數觀矣以功觀之因其所有而有之則萬物莫不有因其

所無而無之則萬物莫不無知東西之相反而不可以
相無則功分定矣以趣觀之因其所然而然之則萬物
莫不然因其所非而非之則萬物莫不非知堯桀之自
然而相非則趣操覩矣昔者堯舜讓而帝之噲讓而絕
湯武爭而王白公爭而滅由此觀之爭讓之禮堯桀之
行貴賤有時未可以為常也梁麗可以衝城而不可以
室穴言殊器也騏驥驊騮一日而馳千里捕鼠不如狸
狌言殊技也鵙鵙夜撮蚤察毫末晝出瞋目而不見丘

山言殊性也故曰蓋師是而無非師治而無亂乎是未
明天地之理萬物之情者也是猶師天而無地師陰而
無陽其不可行明矣然且語而不舍非愚則誣也帝皇
殊禪三代殊繼差其時逆其俗者謂之篡夫當其時順
其俗者謂之義之徒默默乎河伯女惡知貴賤之門小
大之家河伯曰然則我何為乎何不為乎吾辭受趣舍
吾終奈何北海若曰以道觀之何貴何賤是謂反衍無
拘而志與道大蹇何少何多是謂謝施無一而行與道

參差嚴乎若國之有君其無私德繇繇乎若祭之有社
其無私福泛泛乎其若四方之無窮其無所畛域兼懷
萬物其孰承翼是謂無方萬物一齊孰短孰長道無終
始物有死生不恃其成一虛一滿不位乎其形年不可
舉時不可止消息盈虛終則有始是所以語大義之方
論萬物之理也物之生也若驟若馳無動而不變無時
而不移何為乎何不為乎夫固將自化河伯曰然則何
貴於道邪北海若曰知道者必達於理達於理者必明

於權明於權者不以物害已至德者火弗能熱水弗能
溺寒暑弗能害禽獸弗能賊非謂其薄之也言察乎安危
寧於禍福謹於去就莫之能害也故曰天在內人在外
德在乎天知天人之行本乎天位乎德踣躅而屈伸反
要而語極曰何謂天何謂人北海若曰牛馬四足是謂
天落馬首穿牛鼻是謂人故曰無以人滅天無以故滅
命無以得殉名謹守而勿失是謂反其真 每讀南華
至秋水篇輒三復不能已因得聖從所遺蜀烏絲欄自

書之至變憐蛇以下不錄聊取所賞適云嘉祐庚子秋
七月廿九日劉敞遼父題

齋中之寶可玩也

闕款

劉原父嘉祐間得聖從所遺蜀烏絲欄書南華秋水不忘賞適尤為歐陽公之所寶玩頃嘗見之不能釋手今得此卷而保其觀淳熙九年六月既望
書于東府南牕金華王淮季海

此魯公坐政事堂遇大有為之君有以折衝萬里

之外而重中原之文獻其從容整暇蓋如此奕惇
得從其諸孫玉成父遊一日見此亟請而書之熟
視其鸞臺鳳閣之章三歎而作曰前之不忍聞後
之不忍見而顧瞻疇昔又如此玉成父詎可不寶
之邪後學潘奕惇生於嘉定之癸未後五十八年
辛巳拜手以書期風雨之漂搖而此卷之勿失云
修禊日

秋水一篇書不竟都堂三印篆如新中元江左風

流事回首人陳跡未陳潘桂題壬午九月望後一日

不識劉公字今方覩一斑筆兼歐蔡體品在上中間後學徐木潤敬題壬午孟冬

嘉祐去晚唐未遠一時名公書猶有唐人風致遘父舜欽輩是也至東坡山谷始大變東坡尚有會稽北海體制至于涪翁全無古人意蓋世降風移使然響搨之法今無能者撫卷慨然元貞二年中

秋後五日鮮于樞拜觀因信筆記

原父侍讀高才論議博物洽聞固為一代偉人然未嘗以書名世而丞相獲以為寶手自題品識以三省印章想其賞愛之篤亦如原父之好莊文有會于心非他人所能喻也雖然以原父之賢其字畫見重于世自丞相至今百六十餘年猶為王氏所蓄真舊物也來者尚謹藏之至正二年壬午五月四日中山李桓晉仲書

莊生秋水雄無敵原父真書韻有餘丞相魯公題
印在後人奚啻寶璫璵薊丘李衍

昔予觀歐陽公集古錄知其所記古器物形製量
數篆刻字畫必經劉原父侍讀反覆參論而後定
原父之學不可及矣而其翰墨世少見之今觀卿
相魯公家所藏原父手書莊子秋水篇大約字盈
千餘筆墨鮮潤楷法豐美出入蔡薛間而無窘束
信一時書苑之珍哉柳貫題

把玩劉公一紙書遠從嘉祐迄淳熙魯公手澤都
堂印百世子孫文在茲古遂趙映題

右劉侍讀所書莊子秋水篇丞相魯國王公家藏
故物也公之題識當淳熙九年于是居相位已幾
一年矣故題云觀于東府而并用三省印及冀國
公章于其後按公七年以樞密使始封信國八年
拜右丞相復封福國九年進位左揆因改封冀國
至十三年遂疏封于魯其封冀在九年之九月而

題識乃其年之六月則冀國印章蓋題識之後續
所用也此卷今為公四世從孫沿山縣尹雲翁所
藏翁之子閻俾禕書其故如此若劉公書法之妙
諸公論辨已悉茲不贅述至正十二年十二月既
望宗人禕謹記

宋人書法近古蘇黃諸大家外如劉原父雖不以
書自名而意格亦自得其梗概矣後人鋪置點畫
如布基算雖窮歲極力安能有所得哉連日閱晉

帖撫此又不覺其三歎也成化丁未夏六月廿七日長沙李東陽識

此卷金華王相國家故物其印章題識先後賴文忠公一辨正之今為盱眙陳少卿明之寶藏可謂得所歸矣弘治癸亥冬十一月七日後學吳郡徐霖題

劉原父立馬揮九制其敏極矣而從容賞適之筆端雅凝重乃復如是前輩風度故未易論也豈獨

書哉無錫邵寶題

盱眙陳明之官至尚書收藏書畫甚富每有李長沙題跋吾家江貫道江山圖李唐桃源圖皆陳氏物也此卷最矣董其昌題

隆慶戊辰八月三日文彭觀

攜李項篤壽藏本

兒時喜讀莊生秋水篇頗怪夔憐蛇以下似屬蛇足今觀仲遠所書可謂先得我心矣若其楷法清

勁昔人論之已詳余復何言哉伯幾深嘆響搨之
無人惜其流傳未廣前人服善蓋如此鹿城張丑
志

錢公輔

錢君倚別久問稀帖

行書
紙本

公輔啓別久問稀日遲還轅之來得元珍書乃知憂禍
歸于故里榮養未幾不遂雅志痛當奈何奈何冬序已
晚不審孝履何若末由面慰惟冀節哀以力大事遠情

所祝不宜公輔手啓公默祕校大孝服舍 張微之同
此哀苦料日得相依足以自寬季冬初七日

歐陽修

歐陽文忠公寄蘇子美詩卷

五言二十六韻奉酬子美離京後見寄之作廬陵
歐陽修上

衆美子美貌堂堂千人英我獨疑其胸浩浩包滄溟滄
溟產龍蜃百怪不可名是以子美辭吐出人輒驚其於

詩最豪奔放何縱橫衆懸排律呂金石次第鳴間以險
絕句非時震雷霆兩耳不及掩百病為之醒語言既可
駭筆墨尤其精少雖嘗力學老乃若天成濡毫弄點畫
信手不自停端莊雜醜怪羣星見攬槍爛然溢紙幅視
久無定形使我終老學得一已足矜而君兼衆美磊落
猶自輕高冠出人上誰敢出其膺羣臣列丹陛幾位列
公卿使之束帶立可以重朝廷況今參國議高論吐崢
嶸惜哉三十五白髮今已生近者去江淮作詩寄離情

口誦不及寫一日傳都城退之序百物其鳴由不平天
方苦君心欲使發其聲嗟我非鶯鶯徒思和嚶嚶因風
幸數寄聲我聾與盲

趙子崧觀于廬陵凌波閣伯慈伯武伯起侍戊申
歲中元日

右歐陽文忠公訓蘇子美五言二十六韻詩墨蹟
洪武間余在北京時於一戍卒家見遂索取之自
念平生行湖海上有年前代名賢墨蹟多見獨文

忠公書不曾見焉今得此詩墨蹟如獲夜光明月
曷勝忻喜裝潢成卷祕于篋笥中已十五年矣嘗
觀東坡居士文集有跋文忠公書云歐陽文忠公
用尖筆乾墨作方闊字神采秀拔膏潤無窮使後
人觀之如見其清眉豐頰進趨瞻如也今觀此詩
墨蹟方知東坡之言不虛矣此卷付與孫詒謹藏
永為家寶永樂十一年秋七月廿二日逃虛老人
書于京都崇禮坊之官廨

太子少師榮國恭靖姚公嘗得歐陽文忠公誄蘇
子美詩墨蹟甚愛之自謂如獲夜光明月不勝欣
喜遂書付孫詒公之子繼持以示予予觀文忠公
詩稱道子美者以其氣之豪才之雄語之奇不牽
世俗誠卓犖不羣之士也然子美在當時以酒食
微過竟坐流落不偶而文忠他日序其文誌其墓
深致意焉夫不矜細行君子不能無惜於子美而
文忠好賢育才之心見諸文辭者又拳拳焉為當

時諸君子惜也此詩之作子美未卒前七年於今
三百七十餘年矣榮國書此已八年而遺世亦三
年矣人生幾何歲月如馳撫卷惘然永樂十八年
春二月己巳朝議大夫國子祭酒兼翰林侍講豫
章胡儼書

歐陽文忠公有宋名儒文章翰墨妙絕當世此詩
乃公親筆以訓子美蘇公者遺落人間迄今餘三
百年而為太子少師恭靖姚公所得詩固傑作無

容言其書遒勁溫潤尤可愛重恭靖公謂得之如
獲夜光明月不勝欣喜豈虛語哉付之孫詒永為
家寶宜矣永樂庚子蒲節後四日資政大夫戶部
尚書長沙夏原吉書

右歐陽文忠公答蘇子美詩真蹟故太子少師姚
公所藏寶之如拱璧自識其後云付孫詒余嘗以
集本校之不同者五字子美文集作辭衆懸集作
絃驚集作驚能助集仍舊作思和文與辭於義皆

通懸及能助當從真蹟而驚則當從集本余素於少師公往還每造之必肅容坐壽椿堂焚香煮茗出清玩論文事繼以觴酌談笑為樂時詒生數歲拱手侍側溫然恭敬能琅琅誦讀也余戲曰公所恃以老者在此矣公亦矜謂客曰然公沒詒從其父宗善來北京又三年予至北京詒亦長成鄉學余見之輒思公又念公之不及見其長也詒亦重大父之交游而勤勤過予忽不見數月間遇宗善

而詒則病瘖死兩月矣余為之驚愕悼惜而怊悵
者累日詒裁十有四歲其資端厚明秀宜不遽止
此先儒論稟氣清者不長豈以是歟宗善攜此卷
求予題每語及詒涕下潸然悲不勝因并及詒之
所可惜者附少師公之後永樂甲辰夏五月朔廬
陵楊士奇題

余忝鄉里好嘗侍榮國茗飲之側公自負能書雖
當世詹孟舉輩皆不入意獨好文忠公墨蹟豈專

在尖筆乾墨而已其文章政事固足使人景慕之
者東坡所謂清眉豐頰進趨睭如若將見於字畫
之間此言可與知者道然則世之工於書者可不
師法文忠公之為人耶宣德元年燈節之暇行在
翰林修撰張洪書


外錄

書系云歐陽修寄蘇子美詩真蹟姚少師嘗為僧
洪武中住北平慶壽寺得此帖于戍卒家少師自

有跋藏于其孫廷用亦見寓意編也 陳仲醇言
六一居士極好書然書不能工大都書有不可學
處亦猶畫家氣韻必在生知禪家所謂無師智不
可強也而東坡先生題跋云歐陽文忠公用尖筆
乾墨作方濶字神采秀拔膏潤無窮使後人觀之
如見其清眉豐頰進趨睽如也二家持論不同蓋
如此

歐陽文忠公謝惠鼎銘盤記帖

修啓近賈常行曾致拙問辱書承經暑動履清和少慰
瞻勤兼蒙惠以韓城鼎銘及博山盤記不意頓得二奇
物修集錄前古遺蹟自三代以來往往有之獨無前漢
時字故常以為恨今遽獲斯文遂大償素願乃萬金之
賜也屢患膝瘡家居絕客數日把翫無厭然古文難識
當徐訪學古博識之士問之期於盡得而後已不勝珍
重謹於郵中奉狀粗報已獲佳貺餘未及他不宣修頓
首啓原甫安撫學士坐前五月廿二日謹狀



書畫彙考卷九